

# کِتابِ دَوْمِ سِموئیل

## پیشگفتار

کِتابِ دَوْمِ سِموئیلِ اِدامِه کِتابِ اوّلِ سِموئیلِ اَسْتَه.

مَوْضُوعِ هَايِ بِرجَسْتَهِ کِتابِ اينِيَا اَسْتَه:

### فهرِستِ عنوانِها

- داُود از مَرْگِ شائول خبر مُوشَه (فصل ۱: آيَه ۱)
- نَوْحَه خانى داُود بَلَدَه شائول و يوناتان (۱۷:۱)
- داُود، پادشاه يهُودا مُوشَه (۱:۲)
- جنگ داُود و خانوارِ شائول (۸:۲)
- باچه های داُود (۲:۳)
- آبنير قد داُود يَكْجَاهِ مُوشَه (۶:۳)
- كُشته شُدونِ ايشبوشت (۱:۴)
- داُود، پادشاه إسرائيل مُوشَه (۱:۵)
- داُود فَلَاسْطِينِيَا ره شِكْسَت مِيديه (۱۷:۵)
- پس آُردوں صندوقِ عهد (۱:۶)
- وعده خُدا دَ داُود (۱:۷)
- دُعَای داُود (۱۸:۷)
- پیروزی داُود (۱:۸)
- مهریانی داُود دَ بَلَه مِفيبوشت (۱:۹)
- پیروزی داُود دَ بَلَه عمونیا (۱:۱۰)
- داُود و بَتشِبَع (۱:۱۱)
- پَيَغَامِ ناتان و توبَه داُود (۱:۱۲)

فَوْتِ باچِه داُود (۱۵:۱۲)  
أَمْنُون و تامار (۱:۱۳)  
مَرْگِ أَمْنُون (۲۳:۱۳)  
پس آمَدونِ أَبْشَالُومَ دَ اورُشَلَيمَ (۱:۱۴)  
نَقْشِهِ أَبْشَالُومَ بَلْدِه شورِش (۱:۱۵)  
داُود از اورُشَلَيمَ دُوتا مُونه (۱۳:۱۵)  
داُود و صِيبَا (۱:۱۶)  
شِمعِي داُود ره دَوکری مُونه (۵:۱۶)  
مشورِهِ أَخِيتوفِل دَ أَبْشَالُومَ (۱۵:۱۶)  
حُوشَای مشورِهِ أَخِيتوفِل ره باطِل مُونه (۱:۱۷)  
مَرْگِ أَبْشَالُومَ (۱:۱۸)  
داُود از مَرْگِ أَبْشَالُومَ خبرِ مُوشَه (۱۹:۱۸)  
يوآب داُود ره سرزِش مُونه (۱:۱۹)  
پس آمَدونِ داُود دَ اورُشَلَيمَ (۸:۱۹)  
شورِشِ شِبعَ (۱:۲۰)  
داُود انتِقامِ جِبِونيَا ره از أَولادِه شائول مِيگِيره (۱:۲۱)  
جنگ دَ خِلافِ فَلَسْطِينِيَا (۱۵:۲۱)  
سرُودِ شُكْرِگُزارِي داُود پادشاه (۱:۲۲)  
آخرِين تورايِ داُود (۱:۲۲)  
قوَى تَرِين نفرَى داُود (۸:۲۳)  
سرشُمارِي (۱:۲۴)  
داُود يگ قُربانگاه آباد مُونه (۱۸:۲۴)

## داوود از مرگ شائول خبر موشه

۱ بعد از فوت شائول، داوود از شکست ددون عمالیقیا پس آمد و دو روز د  
صیلگ ششت. ۲ د روز سوم ببلغه یگ نفر قد کالای چک-و-چیره و خاک د  
سر-و-رُوی شی از لشکر شائول آمد. وختی د پیش داوود رسید، خود ره د زمی  
آندخته احترام کد. ۳ داوود ازو پُرسان کده گفت: "از کجا آمدی؟" او د جواب  
شی گفت: "از لشکر اسرائیل دوتا کدیم." ۴ داوود دَزشی گفت: "بلده مه بگی که  
چیز کار شد." او گفت: "مردم از جنگ دوتا کد و غدر ازوا کشته شده افتاد.  
شائول و باچه شی یوناتان ام کشته شد." ۵ اوخته داوود د جوانی که بلده ازو خبر  
اوردد، گفت: "چطور فامیدی که شائول و باچه شی یوناتان مُرده؟" ۶ امو جوان  
که بلده شی خبر اوردد، گفت: "اتفاقاً مه از کوه جلوه تیر مُوشدم، د اونجی  
دیدم که شائول د نیزه خو تکیه کده و گاذی های جنگی و سوارای دشمو دزو  
نزدیک شده موره. ۷ او پشت خو ره توخ کد و مره دیده کوی کد. ما گفتم، 'امر  
کو،' ۸ او دز مه گفت: 'تو کی آستی؟' د جواب شی گفتم، 'ما یگ عمالیقی آستم.'  
۹ اوخته دز مه گفت: 'د بله مه ایسته شو و مره بکش، چراکه ما سخت زخمی  
شديم، ليکن جان هنوز د وجود مه آسته.' ۱۰ پس ما د بله ازو ایسته شده او ره  
کشتم، چون ما فامیدم که بعد از او طور زخمی شدو او زنده نمومنه. بعد ازو ما  
تاج سر شی و بازو بند بازوی شی ره گرفتم و د اینجی د پیش بادر خو اوردم.

۱۱ اوخته داوود و تمام کسای که قد شی بود از جاغه خو گرفته کالای خو ره  
چک کد. ۱۲ اونا بلده شائول و باچه شی یوناتان و بلده لشکر خداوند و خانوار  
اسرائیل ماتم گرفته چخرا کد و تا شام روزه گرفت، چراکه اونا قد دم شمشير  
کشته شده افتدد.

۱۳ داوود د امزو جوان که بلده شی خبر اوردد گفت: "تو از کجا آستی؟" او گفت:  
"ما باچه یگ آدم بیگنه از عمالیق آستم." ۱۴ داوود دَزشی گفت: "چطور تو

نَقْرِسِيَّدِي كَه دِسْت خُو ره باله كَدَه مَسَح شُدِه خُداوند ره كُشتى؟“<sup>١٥</sup> اوخته داُوود يكى از نفراي خُو ره كُوى كَدَه گُفت: ”پيش بيه، دَبَلَه ازى حَمله كُو!“ پس او آمَده او ره زَد و او مُرد.<sup>١٦</sup> داُوود دَزُو گُفت: ”خُون تُو دَگردون خود تُوبَشه، چراكه دان تُو دَبَلَه تُوشاهِدى دَد و ختِيكه گفتى، ما مَسَح شُدِه خُداوند ره كُشتُم.“

## نَوْحَه خَانِي دَاوُود بَلْدِه شَائِول و يُونَاتَان

دَاوُود ايني نَوْحَه ره دَبارِه شَائِول و باچِه شى يُونَاتَان خاند:<sup>١٨</sup> - وَأَمَرَ كَه «نَوْحَه كَمُون» بَلْدِه أَوْلَادِه يَهُودَا ياد دَدَه شُنَه. إِي نَوْحَه دَكِتابِ ياشار ام نوِشته يَه.-.-

”شان-و-شَوْكَتْ تُوايِ إِسْرَائِيل، دَجَاهَى هَاهِي بِلَندْ تُوكُشَتَه شُدْ.

زورآورا چِطُور كُشتَه شُدَه أُفتَد!

إِي توره ره دَجَتْ نَكِيدْ

وَدَكَوْچَه هَاهِي أَشْقِلُونْ إِعلَانْ نَكِينَيد؛

اَگَه نَه دُخْتَرُونْ فَلَسْطِينِيَا خوش مُوشَه

و دُخْتَرُونْ ناخَتنَه هَاهِ خوشحالِي مُونَه.

آيِ كَوه هَاهِ جِلْبَوع، شَبِنَم و بارو دَبَلَه شُمُونَباره

و از كِشتزار هَاهِ شُمُونَه هَاهِ حاصِيل نَشُنَه!

چُون دَأُونَجِي سِپِرِ زورآورا قد خاك-و-خُون آلُودَه شُد،

سِپِرِ شائول، که دِیگه قد روغو مَسَحَ نَشُد.

**۲۲** از خُونِ کُشته شُده ها

و از چربی زورآورا،

کمونِ یوناتان پس تاو نخورد

و شمشیرِ شائول خالی پس نَمَد.

**۲۳** شائول و یوناتان دوست دَشتَنی و خوش-آیند بُود،

أُونا دَ زِندگی و مَرگ از يَگْدِيگِه خُو جدا نَشُد!

أُونا از بُرْگُج ها کده تیزتر بُود

و از شیرا کده قَوَى تَر.

**۲۴** آی دُخترونِ إسرائیل، بَلْدِه شائول چخرا کنید،

بَلْدِه کسی که کالاهای سُرخ و چِیزای نفیس ره دَز شُمو مُوپوشَند

و زیوراتِ طِلَّابی ره دَ کالای شُمو سخت مُوكد.

**۲۵** زورآورا چِطور دَ دَورونِ جنگ کُشته شُده اُفتاد!

یوناتان کُشته شُده دَ جای های بِلند اُفتاد!

**۲۶** آی بِرار مه یوناتان، ما بَلْدِه تُو غُصَّه مُونم؛

تُو بَلِدِه مه غَدر خوش—آيند بُودي.

مُحَبَّتِ ازْتُو بَلِدِه مه ڪَلو خاص بُود،

خاصتر از مُحَبَّتِ خاتونو.

٤٧ زورآورا چِطور کُشته شُدَه أفتاد!

و سلاح های جنگی چِطور از بَین رفت!

## داُوود پادشاه يهودا مُوشہ

۲ <sup>۱</sup> بعد امزى واقعه داُوود از خُداوند هدایت طلب کده گفت: ”آيا سُون باله د يکى از شاراي يهودا بورُم؟“ خُداوند دَز شى گفت: ”بورُو.“ داُوود گفت: ”دَكَدم شى بورُم؟“ او گفت: ”دَ حِبرون.“ <sup>۲</sup> پس داُوود قد دُو خاتون خُو، أخِينواعم يِزرعيلى و أبِيجايل بيوه نابال كَرمَلى دَأونجي رفت. <sup>۳</sup> داُوود امُوكسا ره که قد شى بُود، هر كَدم شى ره قد خانوار شى دَأونجي بُرد؛ و أونا دَشاراي حِبرون جاي-د-جاي شُد. <sup>۴</sup> اوخته مردای يهودا آمده داُوود ره دَأونجي مَسَح کد تا پادشاه خانوار يهودا شُنه.

وختي دَ داُوود گفته شُد که مردم يابيشِ جِلعاد شائول ره دَفن کده، <sup>۵</sup> داُوود قاصِدا ره دَپيشِ مردم يابيشِ جِلعاد رَى کد و دَزوا گفت: ”خُداوند شُمو ره بَركت بِديه، چُون شُمو دَ حقِ بادار خُو شائول مهرباني کده او ره دَفن کدید. <sup>۶</sup> آلي دُعا مُونم که خُداوند مُحَبَّت و وفاداري خُو ره نصِيب شُمو کنه؛ و ما بخاطرِ امزي کار شُمو دَ حق شُمو خُوي مُونم. <sup>۷</sup> پس بيليد که دستاي شُمو قَوى بشَه و دليل بشِيد؛ ازى که بادار شُمو شائول فَوت کده، خانوار يهودا مَره مَسَح کده و دَبلِه خُو پادشاه جور کده.“

## جنگِ داؤود قد خانوارِ شائول

دَ عَيْنِ حالِ أَبْنِيرِ باِچه نِيرِ قومَنْدانِ لشکرِ شائول، ایشبوشِتِ باِچه شائول ره گِرفته دَ مَحَنَایِمِ آُورَد<sup>۹</sup> وَ أُو ره دَ بَلَهِ جِلَعَاد، أَشِيرِيا، يِزْرِعِيل، افرايم، بنیامین و تمامِ إِسْرَائِيل پادشاه جور کد.<sup>۱۰</sup> ایشبوشِتِ باِچه شائول چِل ساله بُود که دَ بَلَهِ إِسْرَائِيل پادشاه شُد و دُو سال پادشاهی کد، لیکن خانوارِ يهُودا از داؤود پَیَروی کد.<sup>۱۱</sup> مُدَّتی که داؤود دَ حِبرون دَ بَلَهِ خانوارِ يهُودا پادشاهی کد هفت سال و شَش ماه بُود.

دَ امْزُو غَيْتِ أَبْنِيرِ باِچه نِير و خِدمَتَگارَى ایشبوشِتِ باِچه شائول از مَحَنَایِمِ بُر شُدَه دَ جِبِعُونَ أَمَد.<sup>۱۲</sup> و يوآبِ باِچه صَرُوِيه و خِدمَتَگارَى داؤود ام بُرُو أَمَد و دَ نزدِيكِ نُورِ جِبِعُونَ قد ازوا رُوی دَ رُوی شُد. يگِ جَمِ ازوا دَ يگِ طرفِ نُورِ شِست و دِيگِه جَمِ ازوا دَ دِيگِه طرفِ نُور.<sup>۱۳</sup> اوختهِ أَبْنِيرِ دَ يوآبِ گُفت: "بِيل که مَرَدَى جوان باله شُنَه و دَ پِيشِ رُوی مو زورآزمایي کنه." يوآبِ گُفت: "خُويه، باله شُنَه."<sup>۱۴</sup> پس أُونَا باله شُدَه دَ حِسابِ پِيشِ أَمَد، دوازده نفر از بنیامِين از طرفِ ایشبوشِتِ باِچه شائول و دوازده نفر از خِدمَتَگارَى داؤود.<sup>۱۵</sup> اوختهِ هر كُدَمِ ازوا سرِ حِريفِ خُوره گِرفت و شمشير ره دَ بَغَلِ حِريفِ خُوره گور کد و پَگِ ازوا يگجای دَ زَمِي اُفتَد. امزى خاطرِ أونجى ره «حلَّقت هصُوريَم» نام ایشت که دَ جِبِعُونَ أَسْتَه.<sup>۱۶</sup> دَ امْزُو روزِ جنگِ غَدرِ سَخْت بُود و أَبْنِيرِ و مَرَدَى إِسْرَائِيل از پِيشِ مَرَدَى داؤود شِكْسَت خورد.

سِهِ باِچهِ صَرُوِيهِ يوآب، أَبِيشَاءِ و عَسَائِيلِ دَ أُونجى بُود؛ و عَسَائِيلِ رقمِ آهُوى وَحشى آلَى چابُك-و-تَيَز بُود.<sup>۱۷</sup> پس عَسَائِيلِ أَبْنِيرِ ره دُمْبَالِ کد و دَ غَيْتِ دُمْبَالِ کدونِ أَبْنِيرِ طرفِ راستِ يا طرفِ چَپِ تاوِ نَخُورَد.<sup>۱۸</sup> أَبْنِيرِ پُشتِ خُوره توخ کده گُفت: "عَسَائِيلِ، تُو أَسْتَى که مَرَه دُمْبَالِ مُونَى؟" أَو گُفت: "أَرَى، ما أَسْتُمْ."

أَبْنِيرِ گُفت: "طرفِ راستِ يا چَپِ تاوِ بُخُورِ و يکي از جوانا ره دِسْتِگِيرِ کده

سَلَاحٍ شِي ره بِكِير و بُورُو.“ مَكْمَ عَسَائِيلَ نَخَاستَ كَه از دُمبَالِ كَدونِ اُزو دِستَ بِكَشَه.<sup>۲۲</sup> أَبَنِيرَ بِسَمَ دَعَسَائِيلَ گُفتَ: ”از دُمبَالِ كَدونِ مَه پَس تاوُ بُخُور. چَرا بَايدَ تُو ره دَ زَمَى بِزِنْمَ؟ بَعْدَ اُزو چِطُورِ مِيتُمُ رُوي خُو ره دَ بِرَارِ تُو يوَابِ نِشو بِدِيُم؟“<sup>۲۳</sup> لِيكِنَ عَسَائِيلَ نَخَاستَ كَه پَس تاوُ بُخُوره؛ اوختَه أَبَنِيرَ نَيَزِه خُو دَورَ دَدَه دَ كَورِه اُزو زَدَ كَه نَيَزِه از پُشتَ شِي بُرَ شُدَ و اُو دَ اُموَنجِي اُفتَدَه جَايِ-دَ-جَايِ مُرد. و هَرَ كَسَى كَه دَ اُونِجِي رِسِيد، يَعْنِي دَ اُمْزُو جَايِ كَه عَسَائِيلَ اُفتَدَه مُرْدُد، اِيسَتَه شُد.

<sup>۲۴</sup> مَكْمَ يوَابِ و أَبِيشَايِ دَ دُمبَالِ أَبَنِيرَ رَفَتَ و دَ غَيَّتَ آفَتو شِشَتَو دَ تِيهِ أَمَاهَ كَه رُوي دَ رُوي جَيَحَ دَ رَاهِ بِيابُونِ جِبعُونَ أَسْتَه رِسِيد. <sup>۲۵</sup> أَولَادِه بِنيا مِينَ دَ گِرَدِ أَبَنِيرَ جَمِ شُدَ و اُونَا يِگِ دِستَه جَورِ شُدَه دَ بَلَه يِگِ تِيهِ اِيسَتَه شُد. <sup>۲۶</sup> اَوْختَه أَبَنِيرَ چِيغَ زَدَه دَ يوَابِ گُفتَ: ”آيا شَمَشِيرَ بَايدَ هَمِيشَه موَره كُشتَارَ كَنه؟ آيا تُو نَمِيدَنَى كَه عَاقِبَتِ ازِي كَارِ تَلَخَ أَسْتَه؟ پَس تَا كَيِ دَ نَفَرَى خُو اَمَرَ نَمُونَى كَه از دُمبَالِ كَدونِ بِرارُونَ خُو پَس تاوُ بُخُوره؟“<sup>۲۷</sup> يوَابِ دَ جَوابِ شِي گُفتَ: ”دَ خُدَاءِ زِنَدَه قَسَمَ كَه اَكَه توَرَه نَمُوكَفْتَى، لَشَكَرِ موَتَه صُبَحَ از دُمبَالِ كَدونِ بِرارُونِ إِسْرَائِيلِي خُو دِستَ نَمِيكَشِيد.“<sup>۲۸</sup> پَس يوَابِ شَيْپُورِ ره دَ صَدَا اُورَدَ و تَمَامِ لَشَكَرِ اِيسَتَه شُدَ و اُونَا مَرَدَاءِ إِسْرَائِيلِ ره دِيَگَه دُمبَالِ نَكَدَ و دِيَگَه درِگِيرِ جَنَگَ نَشَدُ. <sup>۲۹</sup> أَبَنِيرَ و نَفَرَى شِي تَمَامِ اُمْزُو شَاوَ از رَاهِ عَرَبِه سَفَرَ كَدَ و از درِيَائِي اُرْدُنِ تَيَرَ شُدَ و تَمَامِ صُبَحَ رَفَتَه دَ مَحَنَايِيمِ رِسِيد.

<sup>۳۰</sup> وَخَتَى يوَابِ از دُمبَالِ كَدونِ أَبَنِيرَ پَس اَمَدَ و تَمَامِ مَرْدُمَ ره جَمَ كَدَ، از خِدَمَتَگَارَى دَأْوَودَ بَغَيرَ از عَسَائِيلَ نُزَدَه نَفَرَ گُمَ بُود. <sup>۳۱</sup> لِيكِنَ خِدَمَتَگَارَى دَأْوَودَ سِه صَدَ و شَصَتَ نَفَرِ بِنيا مِينَى ره كَه نَفَرَى أَبَنِيرَ بُودَ، زَدَه كُشتُد. <sup>۳۲</sup> اُونَا عَسَائِيلَ ره بالَه كَدَ و بُرَدَه دَ قَبْرِ آتِه شِي دَ بَيَت-لَحَمَ دَفَنَ كَدَ. اوختَه يوَابِ و نَفَرَى شِي تَمَامِ شَاوَ رَاهَ رَفَتَ و دَ غَيَّتَ رَوزَ وَاز شُدُو دَ حِبرُونِ رِسِيد.

<sup>۳۳</sup> <sup>۱</sup> جَنَگَ دَ بَيَنِ خَانَوارِ شَائُولَ و خَانَوارِ دَأْوَودَ طُولَ كَشِيدَ؛ دَأْوَودَ رَوزَ دَ رَوزَ

قوی مُوشُد، لیکن خانوارِ شائول روز دَ روز ضعیف شُدہ مورفت.

## باچه های داؤود

<sup>۲</sup> اینی باچه ها بَلَدِه داؤود دَ حِبرون دَ دُنیا آمد: باچه اوّلباری شی آمنون از آخینوَمِ بِرْعِیلی، <sup>۳</sup> دوّم شی کیلاپ از آبِیجايل بیوه نابالِ کَرمَلی، سِوّم شی آبِشالوم باچه مَعکه دُخترِ تلمای پادشاهِ جِشُور، <sup>۴</sup> چارُم شی آدونیاه باچه حَگِیت، پنجم شی شِفَطِیا باچه آبِیطَال <sup>۵</sup> و شَشُم شی یترِعام از عِگله خاتونِ داؤود. پَکِ امزیا بَلَدِه داؤود دَ حِبرون دَ دُنیا آمد.

## آبنیر قد داؤود یَكْجَای مُوشَه

<sup>۶</sup> وَخَتِیکه دَ بَینِ خانوارِ شائول و خانوارِ داؤود جنگ بُود، آبنیر خود ره دَ مینکلِ خانوارِ شائول قَوی جور مُوکد. <sup>۷</sup> شائول یگ کنیزِ دَنَامِ رِصْفَه دَشت که دُخترِ آیه بُود. اوخته ایشبوشِت دَ آبنیر گفت: ”چرا قد کنیزِ آته مه خاو کدی؟“ <sup>۸</sup> آبنیر بخاطرِ تورِه ایشبوشِت غَدر قار شُد و گفت: ”آیا ما یگ کلَه سَگ بَلَدِه یهُودا آسْتُم؟ تا امروز ما دَ خانوارِ آته تُو شائول، دَ بِرَارون شی و دَ دوستای شی وفادار بُودیم و تُوره دَ دستِ داؤود تسلیم نکدیم؛ ولی امروز تُوره بخاطرِ امزی خاتُو گناهکارِ حِساب مُونی. <sup>۹</sup> خُدا امی ره، بلکه کَلوتر ازی ره دَ حقِ آبنیر انجام بدیه؛ اگه ما امُو چِیز ره که خُداوند دَ داؤود قَسَم خورده، بَلَدِه شی انجام نَدیم <sup>۱۰</sup> و پادشاهی ره از خانوارِ شائول گِرفته تَختِ داؤود ره دَ بَلَه إسرائیل و یهُودا از دان تا بِئِرِشَبَع برقرار نَکُنم.“ <sup>۱۱</sup> ایشبوشِت نَتَنِست که دَ جوابِ آبنیر چِیز بُگیه، چُون ازو مِیترسِید.

<sup>۱۲</sup> اوخته آبنیر از طرفِ خود خُو قاصِدا ره دَ پیشِ داؤود رَیی کده گفت: ”ای سرزمی از کی آسته؟ قد ازمه عهد بسته کُو و ما دستِ خُوره قد از تو یگ مُونم تا تمامِ إسرائیل ره سُونِ از تو بِرُم.“ <sup>۱۳</sup> داؤود گفت: ”خُویه، ما قد تُو عهد بسته

مُونُم، ليکن يگ چيز از تُو مِيخاُيم که ايني آسته: وختيکه دَ ديدون مه ميبي مِيخال دُختر شائول ره گِرفته بَير، دَ غير ازو رُوي مَره نَمينگري.<sup>۱۴</sup> اوخته داؤود قاصدا ره دَ پيش ايشبوشت باچه شائول رَي کده گفت: "خاتون مه مِيخال ره که دَ صد پوست ختنه فَلَسْطِينِيَا بلده خُون نامزاد کدم، دَ پيش مه رَي کُو." <sup>۱۵</sup> پس ايشبوشت نفر رَي کده او ره از شُوي شى فَلَطِيئيل باچه لايش گرفت. <sup>۱۶</sup> ولے شُوي شى ام قد ازو قتى رفت و از پُشت ازو تا بَحُوريم چخرا کده آمد. اوخته آبنير دَ فَلَطِيئيل گفت: "تاو خورده پس بوره." و او پس رفت.

<sup>۱۷</sup> دَ عَيْنِ حال آبنير قد رِيش سفیداي إسرائييل گپ زَده گفت: "چند مُدت مُوشَه که شُمو مِيخاهيد که داؤود دَ بَلَه شُمو پادشاه شُنه. <sup>۱۸</sup> پس آلى خاست خُوره انجام بِدِيد؛ چُون خُداوند دَ باره داؤود گفته، دَ وسِيله خِدمتگار خُو داؤود، قوم خُو إسرائييل ره از دِست فَلَسْطِينِيَا و از دِست پَگ دُشمناي شى نجات مِيدِيم." <sup>۱۹</sup> امچنان آبنير توره خُو ره دَ گوش بِنيامِينيا رَسَند؛ و بعد ازو آبنير دَ حِبرون رفت تا تمام چيزاي ره که دَ نظر مردم إسرائييل و خصوصاً دَ نظر پَگ خانوار بِنيامِين خُوب معلوم شُدد، دَ داؤود بُكِيه. <sup>۲۰</sup> پس آبنير قد بِيسَت نفر خُو دَ پيش داؤود دَ حِبرون آمد و داؤود بلده آبنير و نفرای که قد شى بُود يگ مهماني ترتيب دَد. <sup>۲۱</sup> اوخته آبنير دَ داؤود گفت: "ما باله شُده مورُم و تمام إسرائييل ره دَ پيش بادار خُو پادشاه جم مُونُم تا اونا قد از تو عهد بسته کنه و تو دَ بَلَه پَگ حُكمرانی کنى، امُورِم که دِل تُو مِيخايه." پس داؤود آبنير ره رُخصَت کد و او بخَير-و سلامَت رفت.

<sup>۲۲</sup> دَ امزُو غَيت خِدمتگاراي داؤود و يوآب از يگ حَمله پس آمد و قد خُو غَدر و لجه آورد. ليکن آبنير قد داؤود دَ حِبرون نَبُود، چُون داؤود او ره رُخصَت کُدد و او بخَير-و سلامَت رفت. <sup>۲۳</sup> وختي يوآب و تمام لشکري که قد شى بُود رسِيد، دَ يوآب گفته شُد که، "آبنير باچه نير دَ پيش پادشاه آمَدد و پادشاه او ره رُخصَت کد و او بخَير-و سلامَت رفت." <sup>۲۴</sup> اوخته يوآب دَ پيش پادشاه رفت و گفت:

”چی کدی؟ اونه، آبنیر قد پای خو د پیش تُو آمدُد؛ چرا او ره رُخست کدی که بوره؟<sup>۲۵</sup> تُو میدَنی که آبنیر باچه نیر آمَد تا تُوره بازی بِدیه و دَباره رفت و آمَد تُو معلومات بِگِيره و از تمام کارای که تُوانجام میدی باخبر شُنَه.“

اوخته یوآب از حُضُورِ داؤود بُرو رفت و قاصِدا ره از پُشتِ آبنیر رَی کد و اونا او ره از نُورِ سِيره پس آورد؛ ليکن داؤود خبر نَشُد.<sup>۲۶</sup> وختیکه آبنیر دَحِرون پس آمَد، یوآب او ره دَدرگه شار گوشِه کد تا قد شی توره خصوصی بُگیه؛ اوخته دَأونجی بخاطرِ إنِتقامِ خُونِ بِرارِ خو عَسائلِ قد خَنجر دَکوره شی زَد و او مُرد.<sup>۲۷</sup> پسانتر وختی داؤود ای توره ره شِنید، او گفت: ”ما و پادشاهی مه دَحُضُورِ خُداوند دَباره خُونِ آبنیر باچه نیر تا آبد بِيگناه آستی.<sup>۲۸</sup> خُونِ ازو دَگردونِ یوآب و تمامِ خانوارِ آته شی بَشه و دَخانوارِ یوآب همیشه يَگو کس بَشه که دَدانه رِيمتو یا مَرضِ کولی گِرفتار بَشه یا دَبله تیاق تکیه کُنه یا قد دَشمშیر کُشته شُده بُفته و یا مُحتاجِ نان بَشه.“<sup>۲۹</sup> دَامزی رقم یوآب و بِرارِ شی آبیشای آبنیر ره دَقتل رَسَند، چراکه آبنیر عَسائلِ بِرارِ ازوا ره دَجِبعون دَجنگ کُشْتُ.

اوخته داؤود دَیوآب و تمامِ نفرای که قد شی بُود گفت: ”کالای خُوره چَك کنید و پلاس پوشیده بلده آبنیر ماتم بِگیرید.“ و داؤود پادشاه از پُشتِ جِنازه رفت.<sup>۳۰</sup> اونا آبنیر ره دَحِرون دَفن کد و پادشاه دَآوازِ بلند دَسرِ قبرِ آبنیر چخرا کد؛ و پگِ مردم ام دَچخرا کدو شُد.<sup>۳۱</sup> و پادشاه بلده آبنیر نَوحه خانده گفت:

”آیا آبنیر باید رقمی مُومرد که يَگ لَوَّه مُومره؟“

دِستای تُوبَسته نَبُود<sup>۳۲</sup>

و پایای تُوزَولانه نَشُدد.

رقمِ کسی که دَپیشِ روی شریرو کُشته شُده موفته،

وْ كُشته شُدَه أَفَتَدِي.“

وْ پَگِ مرْدُم بِسَم بَلَدِه اُزوْ چخرا کد. <sup>٣٥</sup> اوخته پَگِ مرْدُم آمد وَ حَالِي که هنوز روز بُود داؤود ره شَلَه شُد که نان بُخوره، ليکِن داؤود قَسَم خورده گفت: ”خُدا امي کار ره، بلکِه کَلوتر ازى ره دَ حَقِ ازمه کنه، اگه ما نان يا يَگو چِيزِ دِيگه ره پيش از شِشتونِ آفتَوَ دان خُوبِ زِنُم.“ <sup>٣٦</sup> پَگِ مرْدُم مُتَوَجِه شُد وَ اَيِّ کار دَ نظرِ ازوا خُوب مَعْلُوم شُد؛ اموْ رقم که هر چِيزِي ره که پادشاه انجام مِيدَد، دَ نظرِ پَگِ مرْدُم خُوب مَعْلُوم مُوشُد. <sup>٣٧</sup> پس پَگِ نفرای داؤود و تمامِ إسرائيل دَ امزُو روز فامِيد که پادشاه دَ كُشتنِ آبنير باچِه نير دست نَدَشه.

<sup>٣٨</sup> وَ پادشاه دَ خِدمتگاراي خُو گفت: ”آيا شُمو نَمِيدَنِيد که يَگ سرکرده و يَگ مرد بُزرگِ امروز دَ إسرائيل کُشته شُدَه أَفَتَد؟ <sup>٣٩</sup> ما امروز ضعيفِ أَسْتُم، باوجودِ که پادشاهِ مَسَح شُدَه يُم؛ امي نفرا، يعني باچِه هاي صَرُويه از مه کده قوىَّتَرَ أَسْتَه. خُداوند شريرو ره دَ مُطابيقِ شرارَت شى جَزا بِديه.“

## كُشته شُدونِ ايشبوشت

<sup>٤٠</sup> وختي ايشبوشت باچِه شائول شِنِيد که آبنير دَ حِبرون کُشته شُدَه، دست- و-پاي شى سُست شُد و تمامِ إسرائيل دَ وَحشتَ أَفَتَد. باچِه شائول دُونَفَ داشت که اونا قومَداناي دِستِه تعرُضِي بُود؛ نامِ يَگ ازوا بَعنه بُود و نامِ دِيگِه شى ريكاب. اونا باچِه هاي رِمونِ بيروتى از أولادِه بنِيامِين بُود، چُون بيروت دَ جِمِ بنِيامِين حِساب مُوشُد؛ ليکِن بيروتيا دُوتا کده دَ جِتايم رفتَد و تا امروز دَ اونجي دِ عنوانِ بيگنه زِندگى مُونه.

<sup>٤١</sup> يوناتان باچِه شائول يَگ باچِه داشت که از هر دُونَفَ پاي خُو شَل بُود. او پنج ساله بُود که خبرِ کُشته شُدونِ شائول و يوناتان از يَزِرعييل رسِيد. اوخته دَأِيه شى او ره

دَ بَغْلُ خُو گِرْفَتَه دُوتَا كَد، مَكْمَنَ دَ غَيْتِيَكَه دَ عَجَلَه دُوتَا مُوكَد، أَوْ از بَغْل شَى أَفْتَد و  
شَلَ شُد؛ نَامِ امْزُو باچَه مِيفِبُوشِت بُود.

<sup>٥</sup> يَكْ رَوْزِ رِيكَاب وَ بَعْنَه باچَهَهَايِ رِمْونِ بَئِيرُوتِي رَفَتَه دَ غَيْتِ گَرمِي رَوْزِ دَ خَانِه  
إِيشِبُوشِت دَاخِل شُد وَ أُو دَ خَاوِ چَاشتِي بُود.<sup>٦</sup> أُونَا دَ بَانِه ازِي كَه گَنْدُمِ مِيْگِيرَه دَ  
مَنِه خَانِه دَاخِل شُد وَ قَد شَمْشِير دَ كَورِه إِيشِبُوشِت زَد؛ بَعْد ازُو رِيكَاب وَ بِرار  
شَى بَعْنَه دُوتَا كَد.

<sup>٧</sup> آرِي، وَخَتِيَكَه أُونَا دَ خَانِه دَاخِل شُدِ إِيشِبُوشِت دَ أَتَاقِ خَاوِ خُو دَ بَلَه چَارِپَايِي  
خَاوِ بُود؛ اَوْخَتَه أُونَا أُو رَه زَدَه كُشَت وَ سَرِ شَى رَه اَزْ تَن شَى جَدا كَد. بَعْد ازُو  
سَرِ شَى رَه گِرْفَتَه تَمَامِ شَاوِ اَز رَاهِ عَرَبِه سَفَرَ كَد<sup>٨</sup> وَ سَرِ إِيشِبُوشِت رَه دَ پِيشِ  
دَاؤُود دَ حِبرُونَ أُورَدَه دَ پَادِشَاه گُفت: ”اينَه، سَرِ إِيشِبُوشِت باچَه شَائُول دُشْمُون  
تُوكَه قَصِيدِ گِرْفَتَونِ جَانِ تُورَه دَشَت. خُداونَدِ اِمْرُوزِ اِنْتِقَامِ بَادَارِ موْ پَادِشَاهِ رَه اَز  
شَائُول وَ اَوْلَادِ شَى گِرْفَت.“

<sup>٩</sup> لِيَكِن دَاؤُود دَ جَوابِ رِيكَاب وَ بِرارِ شَى بَعْنَه باچَه هَايِ رِمْونِ بَئِيرُوتِي گُفت:  
”قَسَمِ دَ زِنْدَگِي خُداونَد كَه جَانِ مَرَه اَز هَرِ مُصِيبَت - وَ بَدَبَختِي خَلاصِ كَده،  
<sup>١٠</sup> وَخَتِي كَسِي كَه دَزِ مَه خَبَرَ دَدَه گُفت، ’اونَه، شَائُولِ مُرَدَه‘، وَ فِكَرَ كَه خَبِيرِ  
خَوْشِ أُورَدَه، ما أُو رَه دَسْتِيْگِيرِ كَدُم وَ دَ صِقلَگِ كُشَتُم. اَمِي جَايِزِه بُود كَه بَلَدِه  
خَبَرِ شَى دَزُو دَدُم.<sup>١١</sup> پَس چِيقَسِ كَلوْتَرِ بَشَه جَايِزِه مَرَدَايِ شَرِيرَ كَه يَكْ آدمِ نِيكِ  
رَه دَ خَانِه شَى دَ بَلَه جَاكِه شَى كُشَتَه بَشَه! وَ آلى آيا خُونِ ازُو رَه اَز شُمُو  
بَازِخَاست نَكْنُم وَ شُمُو رَه اَز رُويِ زَمِي نَابُود نَكْنُم؟“<sup>١٢</sup> اَوْخَتَه دَاؤُود دَ مَرَدَايِ  
جَوانِ اَمِرَ كَد وَ أُونَا اَمُو دُو رَه كُشَت؛ أُونَا دِسْت وَ پَايِ اَزوَا رَه مُنْثَى كَد و  
جَسَدَايِ اَزوَا رَه دَ پَالُويِ نَوْرِ حِبرُونَ أَوْزَو كَد. لِيَكِن سَرِ إِيشِبُوشِت رَه گِرْفَتَه دَ  
قَبْرِ اَبَنِيرِ دَ حِبرُونَ دَفَنَ كَد.

## داُوود پادشاه إسرائیل مُوشے

۵ اوخته تمام طایفه های إسرائیل دَ پیشِ داُوود دَ حِبرون آمد و گفت: ”توخ کُو، مو گوشت و استغون تُواستی. ۶ دَ گذشته ام وختیکه شائول دَ بَله مو پادشاه بُود، ای تُوبُودی که لشکرِ إسرائیل ره بُرو مُورِدی و داخل میوردي. امچنان خُداوند دَز تُوكفت، تُوقوم مه إسرائیل ره رهبری مُونی و تُودَبَله إسرائیل حُکمران مُوشی.“

۷ پس تمام ریش سفیدای إسرائیل دَ پیشِ پادشاه دَ حِبرون آمد و داُوود پادشاه دَ حِبرون دَ حُضُورِ خُداوند قد ازوا عهد بسته کد و اونا داُوود ره مَسح کد تا دَ بَله إسرائیل پادشاه شُنَه. ۸ داُوود سی ساله بُود که پادشاه شُد و چِل سال پادشاهی کد. ۹ او هفت سال و شَش ماه دَ حِبرون دَ بَله یهُودا پادشاهی کد و سی و سِه سال دَ اورُشَلَیم دَ بَله تمامِ إسرائیل و یهُودا پادشاهی کد.

۱۰ دَ امزُو غَیتِ پادشاه و نفرای شی دَ اورُشَلَیم دَ خِلافِ یُبُوسیا که باشِنده های امزُو سرزمی بُود رفت و اونا دَ داُوود گفت: ”تُودَ اینجی داخل شُده نَمیتنَی! حتی کورا و لَنگا تُوره پس دور مِیدیه.“ اونا قد خود خُو مُوگفت: ”داُوود دَ اینجی داخل شُده نَمیتنَه.“ ۱۱ لیکن داُوود قلعه صَهیون ره گرفت که فِعلاً شارِ داُوود گفته مُوشِه. ۱۲ داُوود دَ امزُو روز گفت: ”هر کسی که میخایه یُبُوسیا ره بِزنَه، باید از جایی که آو دَ مَنه قلعه موره دَ بَله لَنگا و کورای که داُوود ازوا بد مُوره حمله کنه.“ امزی خاطر گفته شُده: ”کور و لَنگ دَ خانه داخل نَمُوشِه.“

۱۳ دَ امزی رقم داُوود دَ قلعه جای-د- جای شُد و او ره «شارِ داُوود» نام کد. داُوود دَ گرد-و- بر شی از دیوالِ قلعه طرفِ داخل آبادی کد. ۱۴ داُوود روز دَ روز بُزرگ شُده مورفت، چُون خُداوند، خُدای لشکرها قد ازو بُود.

۱۵ دَ امزُو غَیتِ حِیرام پادشاه صُور قاصِدا ره قد چیوای درختِ سَرو و نجارا و

سنگ تَراشا دَ پیشِ داؤود رَی کد؛ و اُونا بَلده داؤود یگ خانه آباد کد.<sup>۱۲</sup> اوخته داؤود فامید که خُداوند او ره دَبله إسرائیل بحیث پادشاه مُقرر کده و پادشاهی ازو ره بخاطرِ قوم خُو إسرائیل دَ جایگاه بلند قرار دده.<sup>۱۳</sup> بعد ازی که داؤود از حِبرون دَ اورُشَلَیم آمد، او دِیگه کنیزا و دُخترو ره ام خاتو کد و باچه ها و دُخترون دِیگه ام بَلده ازو دُنیا آمد.<sup>۱۴</sup> نام های أولادای که بَلده ازو دَ اورُشَلَیم دُنیا آمد، ازی قرار آسته: شَمُوعا، شوباب، ناتان، سُلیمان،<sup>۱۵</sup> بِحار، الیشوع، نِفَگ، یافیع،<sup>۱۶</sup> الیشَمَع، الیداع و الیفلط.

## داؤود فَلَسْطِينِيَا ره شِكست مِيديه

<sup>۱۷</sup> وختی فَلَسْطِينِيَا شِنید که داؤود ره بحیث پادشاه إسرائیل مَسَح کده، تمام فَلَسْطِينِيَا سُون باله بَلده پالیدون داؤود آمد. امی که داؤود دَزی باره شِنید، او دَ قلعه داخل شُد.<sup>۱۸</sup> فَلَسْطِينِيَا آمده دَدره رِفَائیا تیت شُد.<sup>۱۹</sup> اوخته داؤود از خُداوند هدایت طلب کده گفت: ”آیا دَ خِلافِ فَلَسْطِينِيَا بورُم؟ آیا اُونا ره دَ دِستِ ازمه تسَلِیم مُونی؟“ خُداوند دَ داؤود گفت: ”بورُو، ما فَلَسْطِينِيَا ره حتماً دَ دِستِ تو تسَلِیم مُونم.“<sup>۲۰</sup> پس داؤود دَ بَعل-پِرَاصِیم آمد و اُونا ره دَ اُونجی شِكست دده گفت: ”خُداوند دَ بینِ دُشمنای مه دَ پیشِ رُوی مه رَخنه کد، رقمی که آوها رَخنه مُونه.“ امزی خاطر امُو جای ره بَعل-پِرَاصِیم نام کد.<sup>۲۱</sup> فَلَسْطِينِيَا بُتَهای خُو ره دَ اُونجی ايله کد و داؤود و نفرای شی اُونا ره گِرفته بُرد.

<sup>۲۲</sup> فَلَسْطِينِيَا بسم باله آمد و دَدره رِفَائیا تیت شُد.<sup>۲۳</sup> اوخته داؤود از خُداوند هدایت طلب کد و خُداوند گفت: ”باله نَرو، بَلکه دوره کده دَ پُشتِ سرِ ازوا بورُو و دَ پیشِ درختونِ تُوت دَبله ازوا حَمله کُو.<sup>۲۴</sup> وختیکه آوازِ قَدم ها ره از بَلَه درختونِ تُوت شِنیدی، اوخته عَجله کُو، چراکه دَ امزُو غَیت خُداوند پیشلوون تُوت حرکت مُونه تا لشکرِ فَلَسْطِينِيَا ره بِزنَه.“<sup>۲۵</sup> پس داؤود امُو رقم کد که خُداوند دَزُو امر کُدد و او فَلَسْطِينِيَا ره از جِبعه تا جازر شِكست دَد.

## پس آُردوں صندوقِ عهد

۶ داؤود بسم تمام مردای جیرگه تُوی اسرائیل ره که سی هزار نفر بُود جم کد.  
اوخته داؤود و پگ نفرای که قد شی قتی بُود باله شُد سُون بعلے-یہودا رَی  
شُد تا صندوقِ خُدا ره ازونجی بیره، صندوقی ره که د «نام» یاد مُوشُد، یعنی د  
نامِ خُداوند لشکرها که دَبَلَه صندوقَ مینکل کِروپیا حُضور دشت.<sup>۳</sup> اُونا  
صندوقِ خُدا ره دَبَلَه یگ کراچی نَو ایشت و او ره از خانه آبیناداب که دَبَلَه تپه  
بُود گِرفته اُورد. عُزا و آخیو باچه های آبیناداب کراچی نَو ره هَی مُوكد.<sup>۴</sup> وختیکه  
اُونا کراچی ره قد صندوقِ خُدا از خانه آبیناداب از تپه میورد، آخیو پیشِ روی  
صندوق مورفت.<sup>۵</sup> دَمْزو غَیْت داؤود و پگ خانوارِ اسرائیل دَ حُضورِ خُداوند قد  
تمامِ قُوت خُو بازی کده قد آلاتِ مُوسِيقی سُرُود میخاند، یعنی قد بَریط ها، چنگ  
ها، دیره ها، ڈول ها و سَنج ها.

۶ وختی اُونا دَ خرموجوی ناکون رسید، عُزا دستِ خُو ره سُون صندوقِ خُدا دراز  
کد و او ره محکم گِرفت، چُون پای گاواو لخشید.<sup>۶</sup> اوخته آتشِ غَضَبِ خُداوند دَ  
بَلَه عُزا داغ شُد و خُدا او ره بخاطرِ خطای شی دَ امُونجی زَد و او دَ امُونجی دَ  
پیشِ صندوقِ خُدا مُرد.<sup>۷</sup> داؤود سختِ غَمگی شُد، چراکه خُداوند دَبَلَه عُزا حمله  
کدد؛ پس امُوجای ره فارِص-عُزا نام کد که تا امروز دَمْزی نام یاد مُوشَه.<sup>۸</sup> دَ  
امْزو روز داؤود از خُداوند ترسید و گفت: ”چطور صندوقِ خُداوند دَپیشِ ازمه  
بَیه؟“<sup>۹</sup> پس داؤود نَخاست که صندوقِ خُداوند ره دَپیشِ خُو دَ شارِ داؤود بُبره؛  
بَلَکه داؤود او ره دَ خانه عویید-اِدومِ جَتی بُرد.<sup>۱۰</sup> صندوقِ خُداوند دَ خانه  
عویید-اِدومِ جَتی مُدتِ سِه ماه مَند و خُداوند عویید-اِدوم و تمامِ خانوار شی ره  
بَرکت دَد.

۱۲ اوخته دَ داؤود پادشاه گُفته شُد که، ”خُداوند خانوارِ عویید-اِدوم و تمامِ مال-  
و-دارایی شی ره بخاطرِ صندوقِ خُدا بَرکت دَده.“ پس داؤود رفت و صندوقِ

خُدا ره از خانه عویید- ادوم قد خوشحالی د شارِ داؤود آورد.<sup>۱۳</sup> کسای که صندوقِ خُداوند ره مُویرد وختی شش قدم رفت، داؤود یگ نرگاو و یگ گوسله چاغی ره قُربانی کد.<sup>۱۴</sup> داؤود د حاليکه یگ ایفود کتاني ره د گرد خُو پیچ کدد، قد تمام قدرت خُو د حُضُورِ خُداوند بازی مُوكد.<sup>۱۵</sup> د امزى رقم داؤود و تمام خانوارِ إسرائیل صندوقِ خُداوند ره قد چیغ-و-شورِ خوشحالی و آوازِ شیپور باله آورد.<sup>۱۶</sup> امی که صندوقِ خُداوند د شارِ داؤود داخل شد، میخال دخترِ شائول از کلکین خانه توخ کده دید که داؤود پادشاه د حُضُورِ خُداوند خیزک-و-قرتک زده بازی مُونه. پس او داؤود ره د دل خُو تحقیر-و-توهین کد.

<sup>۱۷</sup> اونا صندوقِ خُداوند ره داخل آورده د جای شی د منه خیمه که داؤود بلده شی ایسته کدد ایشت؛ و داؤود قُربانی های سوختنی و قُربانی های سلامتی د حُضُورِ خُداوند تقديم کد.<sup>۱۸</sup> وختیکه داؤود از تقديم کدونِ قُربانی های سوختنی و قُربانی های سلامتی خلاص شد، او مردم ره د نامِ خُداوند لشکرها برکت دد<sup>۱۹</sup> و د پگ مردم، یعنی د تمامِ جمعیتِ إسرائیل، ام د مردا و ام د خاتونو د هر کدم شی یگ دانه نان، یگ ٹوٹه گوشت و یگ دانه کیکِ کشمیشی دد. بعد ازو تمامِ مردم هر کدم شی طرفِ خانه خُو رفت.

<sup>۲۰</sup> اوخته داؤود د خانه خُو رفت تا خانوار خُو ره برکت بدهیه، لیکن میخال دخترِ شائول د نم راهِ شی آمده د طعنه گفت: ”پادشاهِ إسرائیل امروز چیقس خود ره با حُرمَت کد وختیکه خود ره د پیشِ چیمای کنیزای خدمتگارای خُو لُچ کد، امُو رقم که یگ نفرِ ایله‌یی خود ره لُچ کده بے آبرو مُونه.“

<sup>۲۱</sup> داؤود د میخال گفت: ”ای کار مه د حُضُورِ خُداوندی بُود که مرد د جای آته تو و پگِ خانوار شی انتخاب کد تا مرد د بله قومِ خُداوند، یعنی إسرائیل حُکمران تعیین کنه؛ امزی خاطر ما د حُضُورِ خُداوند بازی کدم.<sup>۲۲</sup> ما ازی کده ام کلوتر خود ره حقیر مُونم و د نظرِ خود خُو پست مُوشُم، لیکن د باره کنیزای که توره

گفتی، د پیش ازوا احترام پیدا مونم.<sup>۲۲</sup> و میخال دختر شائول تا روز مردون خو صاحب اولاد نشد.

## وعده خدا د داؤود

<sup>۱</sup> وختی پادشاه د خانه خو جای-د-جای شد و خداوند او ره از شر پگ دشمنای گرد-و-بر شی آرامی دد، <sup>۲</sup> پادشاه د ناتان نبی گفت: "توخ کو، ما د خانه که از چیو سرو آباد شده زندگی مونم، د حاليکه صندوق خدا د منه پرده های خیمه قرار دره." <sup>۳</sup> ناتان د پادشاه گفت: "بورو، هر چیزی که د دل تو آسته انجام بدی، چون خداوند قد تو آسته."

<sup>۴</sup> مگم د امزُو شاو کلام خداوند د ناتان آمده گفت:

"بورو و د خدمتگار مه داؤود بگی که خداوند اینی رقم موگیه، تو کسی نیستی که بلده مه خانه آباد کنی تا ما دز شی جای-د-جای شنم.<sup>۵</sup> ما از روزی که بنی اسرائیل ره از مصر برو اووردم تا امروز دیگ خانه جای-د-جای نشديم، بلکه د یگ خیمه که جايگاه مه بود د حرکت بوديم.<sup>۶</sup> ما د هر جای قد پگ بنی اسرائیل د حرکت بوديم، آيا هرگز ما یگ کلمه دزی باره دیکی از رهبرای اسرائیل گفتيم؟ آيا د کسای که اونا ره بلده چوپونی قوم خو اسرائیل مقرر کدم، گفتم که، "چرا بلده مه یگ خانه از چیو سرو آباد نمونید؟"

<sup>۷</sup> پس آلى د خدمتگار مه داؤود بگی که خداوند لشکرها اينی رقم موگیه، ما تو ره از علفرچ از پشت رمه گرفتم تا د بله قوم مه اسرائیل حکمران شنی.<sup>۸</sup> د هر جای که مورفتی ما قد تو بودم و پگ دشمنای تو ره از پيش روی تو نابود موکدم؛ و آلى ما نام تو ره بزرگ مونم، رقم نام بزرگای روی زمي.<sup>۹</sup> ما بلده قوم خو اسرائیل یگ جای تعیین مونم و اونا ره د اونجی جای-د-جای مونم تا اونا د

جای خودون خُو زِندگی کنه و دِیگه ترس-و-لرز ندشته بشه؛ و مردمای شریر-  
و-بَدکار دِیگه اونا ره آزار-و-آذیت نکنه مِثُل که سابق مُوكد، <sup>۱۱</sup> یعنی دَ دورونی  
که قاضی‌ها ره دَ بَلِه قَوم خُو إسرائیل تعیین مُوكدُم. آرے، ما تُوره از شَرِپَگِ  
دُشمنای تُوارام مُونم؛

امچُنان دَزو بُگی که خُداوند دَز تُ خبر دَده مُوگیه، خُداوند خانه تُوره آباد مُونه.  
<sup>۱۲</sup> و خَتِیکه روز تُ پُوره شُنْه و قد با به کَلونای خُوتی خاک خاو کنی، اوخته ما  
آولاده تُوره که از پُشت کمر تُو دَ وجود مییه، بعد از تُود جای تُوا ایستالجی مُونم  
و پادشاهی شی ره برقرار مُوكنُم. <sup>۱۳</sup> اونمُولده نام مه یگ خانه آباد مُونه و ما  
تَخت پادشاهی ازو ره تا آبد برقرار نگاه مُونم. <sup>۱۴</sup> ما آته ازو مُوشُم و او با چه مه  
مُوشه؛ لیکن اگه خطا کنه، ما او ره قد تیاقِ انسان ها، قد ضَرِبه های تیاقِ بنی  
آدم آدب میدیم. <sup>۱۵</sup> مگم مُحبَّت-و-رحمت مه ازو دُور نمُوشه، رقمیکه از شائول  
دُور کُدم، از کسی که او ره از پیشِ روی تُو باله کُدم. <sup>۱۶</sup> خانه تُو و پادشاهی تُو تا  
آبدَ حُضُور مه پایدار مُومنه و تَخت تُو تا آبد برقرار مُویشه.“

<sup>۱۷</sup> پس ناتان مُطابِق تمام امزی توره ها و پگ امزی رویا قد داؤود توره گفت.

## دُعای داؤود

<sup>۱۸</sup> اوخته داؤود پادشاه رفته دَ حُضُور خُداوند شِشت و گفت: “آی خُداوند-خُدا،  
ما کی اَسْتُم و خانوار مه چی اَسْتَه که تُو مَره تا ای مقام رسَندی؟ <sup>۱۹</sup> ای ام دَ نظر  
تُو کم آمد، آی خُداوند-خُدا، چون تُو دَ باره خانوارِ خدمتگار خُو که دَ زمانای  
دُور مییه ام توره گفتی. آی خُداوند-خُدا، آیا قد پگ انسان ها امی رقم رفتار  
مُونی؟ <sup>۲۰</sup> علاوه ازی داؤود دِیگه چی میتنه دَز تُو بُگیه، چون تُو خدمتگار خُوره  
مینَخشی، آی خُداوند-خُدا. <sup>۲۱</sup> بخاطرِ وعده خُو و مُطابِق میل خُو تُو پگ امزی  
کارای بُزرگ ره انجام دَدی تا خدمتگار خُوره از مقصد خُو باخبر کنی. <sup>۲۲</sup> امزی

خاطر تُو بُزرگ أَسْتِي، آى خُداوند-خُدا، چُون امُورِ رقم که موقد گوشای خُشِنیدے، هیچ کس رقم از تو آلی نییه و غیر از تو دیگه خُدا وجود ندره.<sup>۲۳</sup> رقم قوم تُو إسرائیل، دَرُوی زمی کُدم مِلت آسته که خُدا رفته اُونا ره آزاد کده بشه و اُونا ره بلده خُو قوم جور کده بشه؟ تُو نام خُو ره مشهور کدی و کارای بُزرگ و باهیبَت بلده قوم خُو انجام دَدی و ختیکه مِلت ها و خُدايون ازوا ره از پیش رُوی قوم خُو هَی کدی.<sup>۲۴</sup> و تُو قوم خُو إسرائیل ره بلده خُو آباد-و-أَسْتَوار کدی تا اُونا بلده همیشه قوم تُو بشه و تُو، آى خُداوند، خُدای ازوا بشی.

و آلی آى خُداوند-خُدا، وعده ره که دَباره خِدمتگار خُو و خانوار شی کدی تا آبد برقرار نگاه کُو و چیزی ره که گفتی، مُطابق ازو عمل کُو.<sup>۲۵</sup> بیل که نام تُو تا آبد بُزرگ بُمنه و گفته شُن، 'خُداوند لشکرها خُدای إسرائیل آسته؛' و خانوار خِدمتگار تُو داؤود دَحُضُور تُو برقرار بُمنه.<sup>۲۶</sup> چُون تُو، آى خُداوند لشکرها خُدای إسرائیل، آى ره دَ خِدمتگار خُو بَرملا کده گفتی، 'ما خانه تُو ره آباد مُونم،' امزي خاطر خِدمتگار تُو جُرات کد که امی دُعا ره دَحُضُور تُو بیره.<sup>۲۷</sup> و آلی آى خُداوند-خُدا، تنها تُو خُدا آستی و تورای تُو حِقِيقَت آسته و تُو امی چیزای خُوب ره دَ خِدمتگار خُو وعده کدی.<sup>۲۸</sup> پس آلی مهربانی کده خانوار خِدمتگار خُو ره بَرکت بَدی تا دَحُضُور تُو بلده همیشه باقی بُمنه، چُون خود تُو آى خُداوند-خُدا آى ره گفتی؛ و قد بَرکت از تُو خانوار خِدمتگار تُو تا آبد بَرکت یافته مُوشه."

## پیروزی داؤود

**۸** بعد از چند وخت داؤود فَلَسْطِينِيَا ره زَدَه سرکوب کد و مِتَّگ-آمَاه ره از دِست فَلَسْطِينِيَا گِرفَت. <sup>۲۹</sup> او موآبیا ره ام شِكست دَد. او اُونا ره دَرُوی زمی خاولجی کده قد ریسپو اندازه کد و از هر سِه اندازه ریسپو دُو اندازه شی ره کُشت و اندازه سِوّم ره زِنَدَه ایشت. پس موآبیا خِدمتگارای داؤود شُد و دَزُو جَزِیه مِیدَد.

<sup>۳</sup> داؤود هَدَد - عِزِّر باچِه رِحْوَب، پادشاهِ صُوبَه ره و خَتِيكه مورفت تا قُدرت خُوره دَبَغَلِ دریای فَرات بِسَم دَدِست بِيره، زَد.<sup>۴</sup> و داؤود يگ هزار و هفت صد سوار و بِيسَت هزار عَسْكَرِ پيده ازو ره اسِير گِرفَت و سِنْگِيرِ پايای تمامِ آسپاى گاڻي هاى جنگى ره مُنْثى كد، ليڪن بَلَدَه صد گاڻي جنگى امزُو آسپ ها نِگاه كد. وختي مردمِ ارام از دَمِشَقَ آمدَ كه دَهَدَد - عِزِّر پادشاهِ صُوبَه كومَك كنه، داؤود بِيسَت و دُو هزار نفر ازوا ره ام كُشت.<sup>۵</sup> داؤود دَ منطقَه مردمِ ارام دَمِشَقَ پَيره دارخانه ها قرار دَد و اراميا خِدمتگارِ داؤود شُد و دَزُو جَزيه مِيدَد. دَامزى رقم خُداوند دَ داؤود دَ هر جاي كه مورفت پِيروزي مِيدَد. داؤود سِپرهای طِلَّاَيِي ره كه دَ پِيشِ خِدمتگاراي هَدَد - عِزِّر بُود گِرفَت و دَ اورُشَلِيمَ أُورَد.<sup>۶</sup> امچُنان از باته و بيروتاي كه شاراي هَدَد - عِزِّر بُود، داؤود پادشاه برونزِ بَيَانِ اندازه كَلو دَ دِستَ أُورَد.

<sup>۷</sup> وختي توعى پادشاهِ حمات شِنِيد كه داؤود تمامِ لشکر هَدَد - عِزِّر ره شِكست دَدَه،<sup>۸</sup> او باچِه خُو يورام ره دَ پِيشِ داؤود پادشاه رَبي كد تا احوالِ سلامَتى ازو ره پُرسان كنه؛ و ازى كه داؤود قد هَدَد - عِزِّر جنگ كده و او ره شِكست دَدَه، بَلَدَه شى تبرِيك بُكِيه، چُون هَدَد - عِزِّر قد توعى جنگ دَشت. يورام بَلَدَه ازو چِيزَى نُقره بَيَيِ، طِلَّاَيِي و برونزِي أُورَدُد.<sup>۹</sup> داؤود پادشاه امي چِيزَا ره ام دَ خُداوند وَقف كد، امو رقم كه نُقره و طِلَّا ره از يگ مِلت هاى شِكست خورده وَقف كُدد،<sup>۱۰</sup> يعني از ارام، موآب، عمونيا، فَلَسْطِينِيَا، عِمالِيقِيَا و ُولِجه هَدَد - عِزِّر باچِه رِحْوَب، پادشاهِ صُوبَه.<sup>۱۱</sup>

<sup>۱۲</sup> داؤود دَ غَيَّتِ پس آمَدو هَزَدَه هزار نفرِ إِدومِيَا ره دَ دَرَه نَمَك زَد و دَمَزِي رقم بَلَدَه خُونَامِ كَلَه كَمايِي كد.<sup>۱۳</sup> او دَ إِدومَ پَيره دارخانه ها قرار دَد، يعني دَ تمامِ إِدوم؛ و پَكِ إِدومِيَا خِدمتگارِ داؤود شُد. دَامزى رقم خُداوند دَ داؤود دَ هر جاي كه مورفت پِيروزي مِيدَد.

<sup>۱۴</sup> داؤود دَ بَلَه تمامِ إِسْرَائِيلَ پادشاهِ مُوكَد و عَدَالَت و إِنْصَافَ ره دَ مِينَكِلِ پَكِ

قوم خُود جای میورد.<sup>۱۶</sup> یوآب باچه صَرُویه قومَنداں لشکر بُود و یهوشافاط باچه آخِیلُود کاتِب؛<sup>۱۷</sup> صادوق باچه آخِیطُوب و آخِیمَلک باچه آبیاتار پیشوایو بُود و سِرايا مُنشی؛<sup>۱۸</sup> بنایا یه ویاداع قومَنداں کریتیا و فِلتیا بُود و باچه های داؤود مقام پیشوایی داشت.

## مهریانی داؤود دَبَلَه مِفِیبوشت

<sup>۱۹</sup> يگ روز داؤود پُرسِید: "آیا از خانوار شائول هنوز کُدم کس باقی مَنده تا بخاطر یوناتان دَ حق ازو مِهریانی کُنم؟"<sup>۲۰</sup> دَ امزُو غَیت يگ خِدمتگار خانوار شائول دَ نام صِيبا دَ اونجی بُود و اونا او ره کُوي کده دَ پیش داؤود اُورد و پادشاه ازو پُرسان کده گفت: "آیا تو صِيبا أَسْتِي؟" صِيبا گفت: "خِدمتگار تو حاضر أَسْتِه".<sup>۲۱</sup> پادشاه گفت: "آیا از خانوار شائول هنوز کُدم کس باقی مَنده تا بخاطر خُدا دَ حق شی مِهریانی کُنم؟" صِيبا دَ پادشاه گفت: "يگ باچه یوناتان هنوز باقی يه که از پایای خُوشَل أَسْتِه".<sup>۲۲</sup> پادشاه از شی پُرسان کد: "او دَ کُجا يه؟" صِيبا دَ پادشاه گفت: "فعلاً او دَ خانه ماکیر باچه عَمِئیل دَ لو-دبار أَسْتِه".<sup>۲۳</sup> اوخته داؤود پادشاه نفر رَی کد و اونا او ره از خانه ماکیر باچه عَمِئیل از لو-دبار گِرفته اُورد.

<sup>۲۴</sup> وختی مِفِیبوشت باچه یوناتان دَ پیش داؤود آمد، خود ره قد رُوى خُو آندخته احترام کد. داؤود گفت: "تو مِفِیبوشت أَسْتِي؟" او گفت: "خِدمتگار تو حاضر أَسْتِه".<sup>۲۵</sup> داؤود دَز شی گفت: "نَّترس؛ ما بخاطر آته تو یوناتان حتماً دَ حق تو مِهریانی مُونم و تمام زمِین با به تو شائول ره دَز تو پس مِیدیم و تو همیشه دَ سِر دِستاخون ازمه نان مُخوری".<sup>۲۶</sup> مِفِیبوشت احترام کد و گفت: "ما خِدمتگار تو چی أَسْتُم که تو دَ حق ازمه وَری سَگ مُرده مِهریانی مُونی؟"

<sup>۲۷</sup> اوخته پادشاه صِيبا خِدمتگار شائول ره کُوي کده گفت: "هر چِیزی که دَ شائول

و خانوار شی تعلق داشت، ما د نوسه بادار تو ددم.<sup>۱۰</sup> پس تو، باچه های تو و خدمتگارای تو زمی ره بلده ازو کشت کنید و حاصل شی ره بیرید تا نوسه بادار تو بلده خوردو خوراک دشته بشه، لیکن مفیبوشت نوسه بادار تو همیشه د سر دسترخون ازمه نان مُخورد.“ صیبا پوزده باچه و بیست خدمتگار داشت.

<sup>۱۱</sup> صیبا د پادشاه گفت: ”رقمی که تمام چیزا ره بادار مه پادشاه د خدمتگار خو امر کده، امو رقم خدمتگار تو اونا ره انجام میدیه.“ پس مفیبوشت د سر دسترخون داؤود رقم یکی از باچه های پادشاه نان مُخورد.<sup>۱۲</sup> مفیبوشت یگ باچه جوان د نام میکا داشت. پس تمام کسای که د خانه صیبا زندگی مُوكد خدمتگارای مفیبوشت شد.<sup>۱۳</sup> مفیبوشت د اورشلیم جای-د-جای شد، چراکه همیشه د سر دسترخون پادشاه نان مُخورد. او از هر دو پای خو شل بود.

## پیروزی داؤود د بله عمونیا

<sup>۱۰</sup> بعد از یگ مدت زمان پادشاه عمونیا فوت کد و باچه شی حانون جانشین ازو شد. داؤود گفت: ”ما میخایم که قد حانون باچه ناحاش د نیت نیک رفتار کنم، امو رقم که آته شی قد ازمه د نیت نیک رفتار کد.“ اوخته داؤود از دست خدمتگارای خو پیغام رسی کد تا او ره بخاطر آته شی تسليت بگیه. وختیکه خدمتگارای داؤود د سرزمین عمونیا آمد، <sup>۱۴</sup> حکمرانی عمونیا د بادار خو حانون گفت: ”آیا فکر مونی که داؤود بخاطر احترام آته تو ای قاصدا ره قد پیغام تسليت د پیش تو رسی کده؟ نه، داؤود خدمتگارای خو ره بخاطر معلومات جم کدو و جاسوسی کدو د باره شار رسی کده تا شار ره سرنگون کنه.“ پس حانون خدمتگارای داؤود ره گرفته نیم رسی ازوا ره کل کد و کالاهای ازوا ره از کمر تا پشت ران چک کده اونا ره سون راه شی رسی کد. <sup>۱۵</sup> وختی د داؤود خبر دده شد، او د دم راه ازوا نفر رسی کد، چون اونا غدر احساس شرم مُوكد. پادشاه دزوا گفت: ”د آریحا بمنید تا رسی های شموم رسه، بعد ازو پس ببید.“

<sup>٦</sup> وختی عمونیا دید که داؤود ازوا بَدُر شُدَه، اونا از ارامیای بَیْت-رِحوب و ارامیای صویه بِیسَت هزار عسکر پیده و از پادشاه مَعَکَه يگ هزار نفر و از مردای طوب دوازده هزار نفر ره آجیر کد. <sup>٧</sup> غَيْتِيکَه داؤود دَزَى باره شِنِيد، او یوآب ره قد تمام لَشَكَرِ مردای جنگی رَيَى کد. <sup>٨</sup> عمونیا ام بُر شُدَه آمَد و دَدان درگه شار بَلَدِه جنگ آمادگی گرفت، لیکن ارامیای صویه و رِحوب و مردای طوب و مَعَکَه دَاطِرافِ شار عَلَيَّیده آماده شُد.

<sup>٩</sup> وختی یوآب دید که جنگ دَ خِلاف شی از دُو رُخ دَر مِيگِيره، یعنی ام از پیش رُوی و ام از پُشت سر، او چند نفر از مردای جِرگه توی اسرائیل ره انتخاب کد و اونا ره دَ بَرابِر ارامیا قرار دَد؛ <sup>١٠</sup> و باقی نفرا ره دَ دِستِ بِرار خُو آبیشای تسلیم کد و اونا دَ بَرابِر عمونیا آمادگی گرفت. <sup>١١</sup> یوآب گفت: "اگه ارامیا دَبَلَه مه زور شُد، تُو دَ کومک ازمه بیه و اگه عمونیا دَبَلَه از تو زور شُد، ما دَ کومک از تو میئم." <sup>١٢</sup> قَوی بَشِید و بَبِید که بخاطرِ قوم خُو و بخاطرِ شارای خُدای خُو مردانه جنگ کنی. اُزو او سُو خُداوند هر چیزی که دَ نظر شی خُوب معلوم مُوشَه امُوره انجام بِدیه."

<sup>١٣</sup> پس یوآب و نفرای که قد شی قتی بُود پیش رفت تا قد ارامیا جنگ کنه؛ ولے اونا از پیش اُزو دُوتا کد. <sup>١٤</sup> وختی عمونیا دید که ارامیا دُوتا کد، اونا ام از پیش آبیشای دُوتا کده دَمَنِه شار رفت. اوخته یوآب از جنگ عمونیا پس تاو خورد و دَ اورُشَلَیم آمَد.

<sup>١٥</sup> وختی ارامیا دید که اونا از پیش لَشَكَرِ اسرائیل شِكَست خورده، اونا بسم جم شُدَه يگجای شُد. <sup>١٦</sup> هَدَد-عِزَّر نفر رَيَى کد و ارامیای ره که دَأو طرفِ دریای فَرات بُود آورده؛ اونا دَ حِيلَم آمَد و شویک قومَدانِ لَشَكَرِ هَدَد-عِزَّر پیشلوون ازوا میَمَد. <sup>١٧</sup> وختی دَ داؤود خبر رسید، او پگ لَشَكَرِ اسرائیل ره جم کد و از دریای اُرْدُن تیر شُدَه دَ حِيلَم آمَد. اوخته ارامیا خود ره دَ خِلافِ داؤود آماده کد و قد

شی جنگ کد.<sup>۱۸</sup> لیکن ارامیا از پیش لشکر اسرائیل بسم دُوتا کد و داؤود هفت صد سوار گاڈی های جنگی و چل هزار عسکر پیده ارامیا ره کشت؛ و شویک قومَندان لشکر ازوا ره ام زد که دَ امُونجی مُرد.<sup>۱۹</sup> وختی تمام پادشايونی که خدمتگار هدد- عزِر بُود دید که از پیش لشکر اسرائیل شکست خورده، اونا قد اسرائیل صلح کد و تابع ازوا شد. بعد ازو ارامیا از ترس اسرائیل دیگه دَ عمونیا کومک نکد.

## داوود و بتسبیح

**۱۱** د بهار سال، دَ وختیکه پادشايو دَ جنگ موره، داؤود یوآب ره قد خدمتگارای خُو و تمام لشکر اسرائیل دَ جنگ رَی کد؛ اونا عمونیا ره از بین بُرد و شارِ رَیه ره محاصِره کد. لیکن داؤود دَ اورُشَلیم مَند.

**۱۲** یگ روز دَمِ دیگر داؤود از جاگه خُو باله شُده دَبله بام قصر پادشاهی رفت و دَ حالیکه قدم میزد از بله بام یگ خاتُو ره دید که جان خُوره مُوشُشت؛ امو خاتُو غدر نُوریند بُود.<sup>۲۰</sup> اوخته داؤود نفر رَی کد تا دَ باره امزُو خاتُو پُرس- و- پال کنه و او خبر آورده گفت: ”او بتسبیح دُختر الیعام، خاتُون اوریای حتی آسته.“<sup>۲۱</sup> پس داؤود قاصِدا ره رَی کد که او ره گرفته بَیره و او دَپیش داؤود آمد و داؤود قد ازو خاو شد. — دَ امزُو غَیت او خود ره از ناپاکی عادت ماهوار خُو پاک کُدد. — بعد ازو او پس دَ خانه خُو رفت.<sup>۲۲</sup> امو خاتُو شکامتو شد و دَ داؤود پیغام رَی کده گفت: ”ما حامله آستم.“

پس داؤود دَ یوآب پیغام رَی کد گفت: ”اوریای حتی ره دَپیش ازمه رَی کُو.“<sup>۲۳</sup> و یوآب اوریا ره دَپیش داؤود رَی کد.<sup>۲۴</sup> وختی اوریا دَپیش ازو آمد، داؤود احوال یوآب و احوال لشکر و وضعیت جنگ ره ازو پُرسان کد.<sup>۲۵</sup> بعد ازو داؤود دَ اوریا گفت: ”دَ خانه خُو بُرُو و دَمِ پایای خُوره راست کُو.“ پس اوریا از

قصرِ پادشاه بُر شُدَه رفت و از پُشتِ اُزو از طرفِ پادشاه يگ تُحْفَه رَيَي شُدَه.  
ليکن اُوريَا دَ پيشِ درگه قصرِ پادشاه قد دِيگه خِدمتگاراَيِ بادار خُواوَكَد وَ<sup>٩</sup>  
خانه خُو نَرفَت.

<sup>١٠</sup> وختى دَ داُوود گفته شُدَه که اُوريَا دَ خانه خُو نَرفَته، داُوود دَ اُوريَا گفت: "آيا تُو  
نو از مُسافِرت نَمَدَي؟ پس چرا خانه خُو نَرفَتى؟"<sup>١١</sup> اُوريَا دَ داُوود گفت:  
"صنُدوقِ خُداوند و لشکرِ إسرائِيل و يهُودا دَ خَيمَه ها أَسْتَه و بادار مه يوآب قد  
خِدمتگاراَيِ بادار مه دَ صَحْرَا دَ خَيمَه گاه؛ آيا ما دَ خانه خُو بُورُم و خورده و  
فُچى كده قد خاتُون خُو خاوَكُنم؟ دَ زِندگى تُو و دَ سرُتُو قَسْم که ما اَيِ کار ره  
نَمُونَم!"<sup>١٢</sup> پس داُوود دَ اُوريَا گفت: "امروز ام دَ امِينَجى بشى؛ صباح تُوره رَيَي  
مُونَم." و اُوريَا امُورِ روز تا صُبْحِ روزِ دِيگه شى ام دَ اورُشَلَيم شِشت.<sup>١٣</sup> اوخته  
داُوود او ره كُوي کد که دَ حُضُور شى بُخوره و فُچى كنه و او ره نَشَه کد، ولې  
دَ غَيَّت شام او بُر شُدَه رفت و دَ جاگه خُو قد خِدمتگاراَيِ بادار خُواوَكَد وَ  
خانه خُو نَرفَت.

<sup>١٤</sup> دَ وختِ صُبْحِ داُوود بَلَدِه يوآب يگ خطِ نوِشته کد و از دِستِ اُوريَا دَز شى رَيَي  
کد. <sup>١٥</sup> دَ خطِ اينى رقم نوِشته کدد: "أُوريَا ره دَ خطِ اوَلِ سختَرِين جنگ قرار  
بِدِي و از پالُوي شى عَقَبِ نَشِينى كُوتا او زَدَه شُنَه و بُمُره." <sup>١٦</sup> دَ حالِيكه شار دَ  
محاصرِه يوآب بُود، او اُوريَا ره دَ جايى قرار دَد که مِيدَنِست قَوَى تَرِين مَرَدَاي  
جنگى دُشمو دَ اُونجى أَسْتَه.<sup>١٧</sup> وختى مَرَدَاي شار بُرو أَمَدَه قد يوآب جنگ کد،  
بعضى نفَرَى که خِدمتگاراَيِ داُوود بُود کُشتَه شُدَه اُفتَد و اُوريَايِ حتَى ام قد ازوا  
کُشتَه شُدَه.<sup>١٨</sup> اوخته يوآب قاصِدِ رَيَي کدَه تمامِ خبرِ جنگ ره دَ داُوود رَسَند؛ و  
دَ قاصِدِ هِدَايَت دَدَه گفت: "وختِيكه تمامِ خبرِ جنگ ره دَ پادشاه رَسَندى،<sup>١٩</sup> اَكَه  
قارِ پادشاه باله أَمَد و دَز تُو گفت، 'چرا دَ غَيَّتِ جنگ دَ شار أَوْقَس نَزِدِيك شُدِيد؟  
آيا شُمُو نَمُوفا مِيدِيد که از بَلَه دِيوال قد تَير مِيزَنه؟"<sup>٢٠</sup> آبيملِك باچِه يُرُوب- بشِت ره  
کى كُشت؛ آيا يگ خاتُون سِنگِ بَلَه دِستاس ره از بَلَه دِيوال دَ سرِ اُزو پورَتَه نَكَد و

او د تِبِص نَمُرد؟ پس چرا دَ دیوال شار نزدِیک شُدید؟ اوخته توَذ شی بُگی، خِدمتگار توْ اوریای حتی ام کُشته شُد.“

<sup>۲۲</sup> پس قاصِد رَی شُدَه آمد و تمام پیغام ره دَ داؤود رسَند، امُورِقَم که یوآب دَزو گُفتَد. <sup>۲۳</sup> و قاصِد دَ داؤود گُفت: ”مردای دُشمَو دَبِله مو زور شُد و دَ صَحرا دَبِله مو حَمله کد، لیکن مو اونا ره تا دانِ درگه شار پس دَوَندی. <sup>۲۴</sup> اوخته تیراندازا از بَلَه دیوال خِدمتگارای توْ ره قد تیر زَد و بعضی از خِدمتگارای پادشاه کُشته شُد؛ خِدمتگار توْ اوریای حتی ام کُشته شُد.“

<sup>۲۵</sup> دَاؤود دَ قاصِد گُفت: ”دَ یوآب اینی رقم بُگی، نَیل که ای چِيزا توْ ره پریشان کُنه، چُون شمشیر هر کس ره که دَم شی بیه مُوكشه. جنگ ره دَ خِلافِ شار شِدت بِدی و او ره سرنگون کُو؛ و توْ او ره تشويق کُو.“

<sup>۲۶</sup> وختی خاتون اوریا شِنید که شُوی شی کُشته شُدَه، او بَلدِه شُوی خُو ماتم گِرفت. <sup>۲۷</sup> وختیکه روزای ماتم خلاص شُد، دَاؤود نفر رَی کده او ره دَ خانه خُو آورد و او خاتون شی شُدَه بَلدِه شی یگ باچه دُنیا آورد. لیکن کاری ره که دَاؤود کُدد، دَ نظرِ خُداوند زِشت معلوم شُد.

## پیغامِ ناتان و توبِه دَاؤود

<sup>۱</sup> پس خُداوند ناتان ره دَ پیشِ دَاؤود رَی کد و او پیشِ دَاؤود آمَدَه دَزو گُفت: ”دَ یگ شار دُو مرد بُود، یگ شی دارا و دِیگه شی نادار. <sup>۲</sup> مرد دارا گَله و رمه غَدر کَلو دَشت؛ <sup>۳</sup> لیکن مرد نادار هیچ چِيز نَدَشت بغير از یگ ماده-باره ریزگَک که او ره خَریدُد. او امُور ماده-باره ره کَله کد و قد ازو و بچکیچای شی یگچای کَله شُد؛ امُور ماده-باره از خوراک ازو مُخورد و از پیله شی ُچی مُوك و دَ بغل شی خاو مُوكد و او بَلدِه ازو مِثِل یگ دُختر بُود. <sup>۴</sup> یگ روز یگ مُسافِر دَ

پیشِ امزو مَرِ دارا آمد و او حیفی شی آمد که از گله یا رمه خود خُو بِگیره و بلده مسافری که دَ پیش اُزو آمده تیار کنه. اوخته او ماده-باره امزو مَرِ نادار ره گرفته بلده امزو نفر که دَ پیش شی آمد، آمده کد.“

<sup>۵</sup> اوخته قارِ داؤود دَ بله امزو مرِ ثروتمند باله آمد و دَ ناتان گفت: ”دَ زندگی خداوند قسم، مردی که امی کار ره کده، جزای شی مرگ آسته! <sup>۶</sup> ازی که او امی کار ره کده و هیچ رَحْم نکده، او باید بلده تاون ماده-باره چار چند پس بدیه.“

<sup>۷</sup> اوخته ناتان دَ داؤود گفت: ”امو مرد تو آستی! خداوند، خدای إسرائیل اینی رقم مُوگیه، ما تو ره مسح کده دَ بله إسرائیل پادشاه جور کدم و تو ره از دست شائول نجات ددم. <sup>۸</sup> ما خانه بادار تو ره دَز تو ددم و خاتونی بادار تو ره دَ بغل تو آندختم و خانوار إسرائیل و یهودا ره دَز تو تسلیم کدم. اگه آمیا کم بود، ما بلده تو دیگه ام کلوتر میدم. <sup>۹</sup> پس چرا کلام خداوند ره خار-و-حقیر حساب کده کاری ره انجام ددی که دَ نظر شی زشت آسته؟ تو اوریای حتی ره قد شمشیر زدی و خاتون شی ره گرفته بلده خُو خاتو کدی. آرے، تو او ره قد شمشیر آولادِ عمون دَ قتل رسندي. <sup>۱۰</sup> امزي خاطر شمشیر هرگز از خانه تو دور نموش، چراکه تو مره حقیر-و-توهین کدی و خاتون اوریای حتی ره گرفتی تا خاتون تو شن. <sup>۱۱</sup> خداوند امچنان مُوگیه، اینه، ما از خانه خود تو دَ بله تو بلا نازل مُونم؛ ما خاتونی تو ره دَ پیش چیم تو گرفته دَ همسایه تو میدم و او دَ حضور امزي آفتَو قد خاتونی تو خاو مونه. <sup>۱۲</sup> آرے، تو امی کار ره تاشکی کدی، لیکن ما ای کار ره دَ حضورون پگ إسرائیل و دَ روشنی روز مُونم.“

<sup>۱۳</sup> اوخته داؤود دَ ناتان گفت: ”ما دَ ضدِ خداوند گناه کدیم.“

натان دَ داؤود گفت: ”میدنم، ولی خداوند گناه تو ره معاف کده؛ تو نمومری. <sup>۱۴</sup> لیکن ازی که تو خداوند ره قد امزي کار تحقیر کدی، باچه که بلده تو دَ دُنیا آمده، حتماً مومره.“ <sup>۱۵</sup> بعد اُزو ناتان دَ خانه خُو رفت.

## فوتِ باچه داؤود

خُداوند نِلغه ره که خاتونِ اوریا بَلده داؤود دَنْیا اُوردد زَد و او ناجور شُد.

<sup>۱۶</sup> داؤود دَپیشِ خُدا بَلده نِلغه دُعا کده روزه گِرفت و تمام شاوَد رُوی زمی خاو کد. <sup>۱۷</sup> رِيش سفیدای خانه شی دَبَله سر شی ایسته شُد که او ره از زمی رُست کنه، لیکن او قُبول نَکد و قد ازوا نان نَخورد. <sup>۱۸</sup> دَروزِ هفتُم نِلغه مُرد، ولے خِدمتگارای داؤود ترس خورد که دَز شی بُگیه نِلغه مُرد، چُون اونا قد خود خُو گفت: ”وختیکه نِلغه زِنده بُود، مو قد شی توره گُفتی و او توره مو ره گوش نَکد، پس آلى چِطُور مِیتنی دَزُو خبر بَدی که نِلغه مُرد؛ إمکان دَره که او خود ره کَلوتر زَجر بَدیه.“ <sup>۱۹</sup> وختی داؤود دِید که خِدمتگارای شی قد یگدیگه خُو پُس پُس مُونه، داؤود فامِید که نِلغه مُرد؛ و داؤود از خِدمتگارای خُو پُرسان کد: ”آیا نِلغه مُرد؛“ اونا گفت: ”آرَى، او مُرد.“

<sup>۲۰</sup> او خته داؤود از زمی باله شُدہ خود ره شُشت و خود ره چرب کده کالای خُو ره تبدیل کد؛ بعد ازو دَخانه خُداوند رفت و عِبادت کد. ازُونجی پس دَخانه خُو آمدہ نان طلب کد و اونا نان ره دَپیش شی ایشت و او خورد.

<sup>۲۱</sup> دَامزو غَیت خِدمتگارای شی دَزُو گفت: ”ای چی کار بُود که تو کدی؟ وختیکه نِلغه زِنده بُود تو روزه گِرفتی و چخرا کدی، لیکن غَیتیکه نِلغه مُرد، تو باله شُدہ نان خوردی.“ <sup>۲۲</sup> او گفت: ”وختیکه نِلغه زِنده بُود، روزه گِرفتم و چخرا کُدم، چُون گُفتُم، کَی مِیدَنه؟ شاید خُداوند دَبَله مه رَحَم کنه و نِلغه زِنده بُمنه؛“ <sup>۲۳</sup> لیکن آلى که او مُرد، چرا روزه بِگیرم؟ آیا ما مِیتنم او ره پس بِيرُم؟ روزی میبَه که ما دَپیش ازو مورُم، مگم او دَپیش ازمه پس نَمیبَه.“

<sup>۲۴</sup> بعد ازو داؤود خاتون خو بَتشَبَع ره دِلداری کد و دَپیش ازو رفته قد شی خاو شُد و او یگ باچه دَنْیا اُورد و داؤود نام شی ره سُلیمان ایشت. خُداوند او ره

دوست داشت<sup>۲۵</sup> و دَ وسِيله ناتانِ تَبَي يگ پَيغام رَيَ كد؛ و او بخاطرِ خُداوند نامِ ازُو ره يديدياه ايشت.

دَ امزُو غَيت يوآب دَ رَيَه قد أَولادِه عمون جنگ کد و پايتختِ ازوا ره محاصِره کد.<sup>۲۶</sup> يوآب قاصِدا ره پيشِ داُود رَيَ کده گفت: ”ما قد رَيَه جنگ کدم و جايی ره که دَ شار آو مِيديه گِرفتم.<sup>۲۷</sup> پس آلى باقى لشکر ره جم کده بيَه و رُوي دَ روی شار خَيمه زَده او ره بِكِير؛ نَشْنَه که شار ره ما بِكِيرُم و دَ نامِ ازمه ياد شُنه.“<sup>۲۸</sup> پس داُود تمام لشکر ره جم کده دَ رَيَه رفت و دَ خِلاف شى جنگ کده او ره گِرفت.<sup>۲۹</sup> داُود تاجِ پادشاهِ ازوا ره از سر شى گِرفت که تول شى يگ وَزنِه طِلا بُود و سنگای قِيمَتَى دَز شى سخت شُدد و او دَ سر داُود ايشه شُد. او امچُنان ُولجِه بَى اندازه کلو امزُو شار گِرفته بُرد.<sup>۳۰</sup> او مردمی ره که دَ مَنه شار بُود بُر کده اُورد و وظِيفه دَد که قد اَره ها، کُلنگ های آينى و تيشه های آينى کار کنه و يا کارگرای داشای خِشت بَشه. او قد تمام شارای اَولادِه عمون دَ امزى رقم رفتار کد. بعد از داُود و تمام لشکر پس دَ اورُشَليَم آمد.

## آمنون و تamar

**۱۳** بعد از گذشت زمان آينى واقعه رُخ دَد: آ بشالوم باچه داُود يگ خوارِ نورَيند دَ نامِ تamar داشت و آمنون باچه داُود عاشقِ ازُو شُدد.<sup>۳۱</sup> آمنون دَ اندازه گِرفتار شُدد که بخاطرِ خوارِ اندر خُوتamar خود ره ناجور کدد، چون او دُخترِ خانه بُود و دَ نظرِ آمنون سخت خورد که قد ازُو يَگو کار کنه.

آمنون يگ رفيق دَ نامِ يوناداب داشت که او باچه شِيمِعاَه يعني باچه بِرارِ داُود بُود؛ و يوناداب يگ مردِ غَدر چالاک بُود.<sup>۳۲</sup> او دَ آمنون گفت: ”آى باچه پادشاه، چرا روز دَ روز لاغر شُده موري؟ آيا دَز مه نَموگى؟“ آمنون دَز شى گفت: ”ما تamar، خوارِ بِرارِ اندر خُوتamar ره دوست دَرم.“<sup>۳۳</sup> يوناداب دَزو گفت: ”بورُو،

دَ جاِگه خُو خاو کُو و خود ره ناجور بِندَز؛ و خِتیکه آنه تُو بلده پُرسِیدون تُو آمد،  
دَزُو بُگی، لُطفاً خوار مه تامار ره بیل که بییه و یگو چیز بلده مه بِدیه تا بُخورم.  
بیل که بییه و خوراک ره دَپیش چِیم مه تیار کنه تا ما بنگرم و از دست شی  
بُخورم.”<sup>٩</sup> پس آمنون خاو کد و خود ره ناجور آندخت؛ و خِتیکه پادشاه بلده  
پُرسِیدون شی آمد، آمنون دَپادشاه گفت: “لُطفاً خوار مه تامار ره بیل که بییه و  
چند دانه کیک دَپیش چِیم مه پُخته کنه تا از دست شی بُخورم.”

<sup>٧</sup> اوخته داؤود قاصد ره دَخانه دَپیش تامار رَی کده گفت: “دَخانه بِرار خُو  
آمنون بُرُو و بلده شی خوراک تیار کُو.”<sup>٨</sup> پس تامار دَخانه بِرار اندر خُو آمنون  
رفت و او دَجاِگه خُو بُود. تامار آرد ره گِرفته خَمیر کد و دَپیش چِیم ازو کیک  
ها ره تیار کده پُخته کد. <sup>٩</sup> بعد ازو تاوه ره گِرفته دَپیش ازو ایشت، لیکن او  
نخورد و گفت: “پگ ره از پیش مه بُر کنید!” پس کُلگی از پیش ازو بُرو رفت.  
<sup>١٠</sup> اوخته آمنون دَتامار گفت: “آلی خوراک ره دَأُتاق مه بَیر تا از دست تُو  
بُخورم.” و تامار کیک ها ره که تیار کُد، گِرفته دَپیش بِرار خُو آمنون دَأُتاق  
شی آورد.<sup>١١</sup> لیکن و خِتیکه تامار کیک ها ره دَپیش ازو آورد که بُخوره، آمنون او  
ره بَغل کد و دَز شی گفت: “آی خوار مه، بیه قد مه خاو کُو.”<sup>١٢</sup> تامار دَزُو گفت:  
”نه بِرار مه، مَره بِعِزَّت نَكُو، چُون ای رقم کار دِاسرائیل انجام دَد نَمُوشَه؛ ای  
عملِ زِشت ره انجام نَدَی.<sup>١٣</sup> ما ای رَسوایی خُو ره دَكُجا بُبرُم؛ و تُو ام دِاسرائیل  
رقم یکی از آدمای پَست-و-ایلهَی مُوشی. پس لُطفاً قد پادشاه گپ بِزن؛ چُون او  
مره از تُو درِبغ نَمُونه.”<sup>١٤</sup> لیکن آمنون نَخاست که تورِه ازو ره بِشنوَه؛ و بخاطری  
که ازو کده زور تُو بُود، قد ازو خاو شُدَه او ره بِعِزَّت کد.

<sup>١٥</sup> بعد ازو آمنون قد نفرت بِعِاندازه کلو ازو بَدُبر شُد؛ نفترت ازو کلوتر از مُحبَّتی  
بُود که نِسبَت دَزُو دَشت. پس آمنون دَزُو گفت: “باله شُو و بُرُو！”<sup>١٦</sup> تامار دَزُو  
گفت: ”نه، ای رقم نَكُو، چُون ای بَدَی که مَره سُون راه مه رَی مُونی، بَدَتَر از کار  
دِیگِه آستَه که تُو دَحق ازمه کدَی.“ لیکن آمنون نَخاست که تورِه ازو ره بِشنوَه.

<sup>۱۷</sup> او خِدمتگار خُوره که او ره خِدمت مُوكد کُوي کده گفت: ”ای ره از پیش مه  
وئی کُو و درگه ره از پُشت شی کیب کُو.“ <sup>۱۸</sup> پس خِدمتگار شی او ره بُر کد و  
درگه ره از پُشت شی کیب کد. تامار چَپَنِ رَنگِ رَنگِ دَجانِ خُودشت، چُون  
دُخترونِ -خانِه پادشاه امُورِ رقم چَپَنِ مُوپوشید. <sup>۱۹</sup> او چَپَنِ رَنگِ رَنگِ ره که دَ  
جانِ شی بُود چَک کده خَگشتر ره دَ سرِ خُوباد کد و دِستای خُوره دَ بَلَه سر  
خُو گِرفته رَبی شُد؛ او دَ غَيْتیکه مورفت دَ آوازِ بلند چخرا مُوكد.

<sup>۲۰</sup> بِرار شی أَبَشالوم دَزُو گفت: ”آيا بِرار تُو أَمنون قد تُو بُوده؟ خوار مه، فِعلاً خود  
ره قرار بِگیر؛ او بِرار تُو أَسته. پس ای توره ره دَ دِل خُونَگیر.“ اوخته تامار  
کوئیویار -و- پریشان شُدَه دَ خانِه بِرار خُو أَبَشالوم مَند. <sup>۲۱</sup> وختی داؤود پادشاه دَ  
باره پَگِ امزی چِیزا شِنید، او غَدر قار شُد، ولی نَخاست که باچِه خُو أَمنون ره  
جزا بِدیه، چراکه او ره کَلو دوست دَشت، چُون او اولباری شی بُود. <sup>۲۲</sup> أَبَشالوم دَ  
أَمنون هیچ چِیز نَگفت، نَه خُوب و نَه بَد، چُون أَبَشالوم از أَمنون بَد مُویرد، چراکه  
او خوار شی تامار ره بَیعَت کُدد.

## مرگِ أَمنون

<sup>۲۳</sup> بعد از دُو سال، دَ غَيْتیکه أَبَشالوم دَ بَعل -حاصور دَ نزدِیکِ افرايم پاشُم بُری  
دَشت، او تمام باچه های پادشاه ره مهمو کد. <sup>۲۴</sup> او دَ پیشِ پادشاه أَمدَه گفت:  
”اینه، خِدمتگار تُو پاشُم بُری دَره؛ خاهِش مُونم که پادشاه و خِدمتگارای شی قد  
نوکر خُوبوره.“ <sup>۲۵</sup> لیکِن پادشاه دَ أَبَشالوم گفت: ”نه باچِه مه، پَگ مو نَمیبی؛ نَشنَه  
که مو بار تُو ره گِرنگ کنی.“ أَبَشالوم او ره غَدر شَلَه شُد، لیکِن او نَخاست که  
بوره، ولی أَبَشالوم ره بَرکت دَد. <sup>۲۶</sup> اوخته أَبَشالوم گفت: ”اگه شُمو نَمیبید، لُطفاً  
بِرار مه أَمنون ره بَیل که قد ازمو بوره.“ پادشاه دَزُو گفت: ”چرا او قد شُمو  
بوره؟“ <sup>۲۷</sup> لیکِن ازی که أَبَشالوم غَدر شَلَه شُد، او أَمنون و دِیگه شاهزاده ها ره  
ایشت که قد ازو بوره. اوخته أَبَشالوم یگِ مهمانی شاهانه ترتیب دَد. <sup>۲۸</sup> اوخته

آ بشالوم د خِدمتگارای خُو امر کده گفت: ”فِکر شُمو بَشِه، و خِتیکه دل آمنون از نشِه شراب خوش شُد و ما دَز شُمو گُفتُم، ‘آمنون ره بِزَنید، اوخته او ره بُكُشید. ترس نَخورِيد، چُون ما دَز شُمو امر کديم. با جُرات و دلير بَشِيد.“<sup>۲۹</sup> پس خِدمتگاراي آ بشالوم د حق آمنون امو کار ره کد که آ بشالوم امر کدد. و د امزُو غَيت دِيگه باچه هاى پادشاه باله شُده هر کُدم شى قاطِر خُوره سوار شُد و دُوتا کد.

<sup>۳۰</sup> د حاليکه اونا د راه بُود، د داؤود خبر رسيد که آ بشالوم پگ باچه هاى پادشاه ره کُشته و يکي ازوا ام زنده نَمنده.<sup>۳۱</sup> اوخته پادشاه باله شُده کالاي خُوره چَك کد و د رُوي زمي براز أفتاد؛ و پگ خِدمتگاراي شى که د گِرد ازو ايسته بُود ام کالاي خُوره چَك کد.<sup>۳۲</sup> ليكن يوناداب باچه شيمعا، يعني باچه بِرار داؤود گفت: ”بادار مه فِکر نکنه که پگ مردai جوان، يعني باچه هاى پادشاه کُشته شُده، چُون تنها آمنون کُشته شُده و بَس. إى قَصَد د دل آ بشالوم از روزي بُود که آمنون خوار ازو تamar ره بِعِزَّت کدد.<sup>۳۳</sup> پس آلى بادار مه پادشاه إى توره ره د دل خُوجاي نديه و فِکر نکنه که پگ باچه هاى پادشاه کُشته شُده، چراکه تنها آمنون کُشته شُده.“

<sup>۳۴</sup> دَمْزِي گِير-و-دار آ بشالوم دُوتا کد و جوانى که پيره داري مُوكد سُون باله توخ کد و ديد که غَدر مردم از بغل تِپه از راه حورونايم مييه. اوخته او د پيش پادشاه رفت و گفت: ”ما ديدم که غَدر مردم از بغل تِپه از راه حورونايم مييه.“<sup>۳۵</sup> اوخته يوناداب د پادشاه گفت: ”اونه، باچه هاى پادشاه مييه؛ امو رقم که خِدمتگار تو گفتُد، امو رقم شُد.“<sup>۳۶</sup> امي که او از توره گفتوا خلاص شُد، باچه هاى پادشاه رسيد و آواز خُوره بلند کده چخرا کد؛ اوخته پادشاه و پگ خِدمتگاراي شى ام زار زار چخرا کد.

<sup>۳۷</sup> آ بشالوم دُوتا کده د پيش تلمای باچه عمِيَهُود پادشاه جِشور رفت. داؤود بلده

باقه خو هر روز ماثم موكد.<sup>۳۸</sup> ابسالوم که د جشور دوتا کدد، مدت سه سال د آونجي مند.<sup>۳۹</sup> و دل داود پادشاه ميتبيد که د پيش ابسالوم بوره، چون او د باره مرگ آمنون تسلی پيدا کدد.

## پس آمدن ابسالوم د اورشليم

**۱۴** یواب باچه صرويه فاميده که دل پادشاه بلده دیدون ابسالوم ميتبه.<sup>۴</sup> پس یواب د تقوعه نفر ربي کده ازونجي يگ خاتون دانا ره او رد و دزو گفت: "خود ره عزادار نشو دده کالاي عزاداري د جان خو کو و خود ره قد روغو چرب نکو، بلکه رقم خاتونی رفتار کو که بلده روزای کلو بخاطر مارده ماتم گرفته.<sup>۵</sup> اوخته د پيش پادشاه بورو و دزو ايني تورا ره بگي." و یواب امو تورا ره د دان شي آندخت.

**۴** پس خاتونی که از تقوعه بود د پيش پادشاه رفت و خود ره قد روی خود زمي آندخته دزو احترام کد و گفت: "آي پادشاه، کومک کو!"<sup>۶</sup> پادشاه از شي پرسيد: "چي مشکل دری؟" خاتو گفت: "ما يگ خاتون بیوه آستم، چون شوی مه مارده. **۶** کنيز تو دو باچه دشت؛ اونا د ببابو قد يگديگه خو جنگ کد و د آونجي کس نبود که اونا ره جدا کنه. پس يکي ازوا دیگه شي ره زده کشت.<sup>۷</sup> الی تمام اولاد بابه د خلاف کنيز تو باله شده و موگيه، امو که برار خو ره زده، او ره د دست ازمو تسليم کو تا مو او ره بخاطر گرفتون زندگي برار شي بکشي و قد امزى کاريگانه وارث ره از بين ببرى. د امزى رقم اونا ميخايه که قوغ نيم سوخته مره که باقی مارده گل کنه و بلده شوی مه نه نام گيره و نه باقی مارده د روی زمي بيله."

**۸** پادشاه د خاتو گفت: "تو خانه خو بورو و ما د باره تو حکم مونم."<sup>۸</sup> خاتونی که از تقوعه بود د پادشاه گفت: "آي بدار مه پادشاه، بيل که امي جرم د گردون ازمه و خانوار آته مه بشه و پادشاه و تخت شي از جرم دور بشه."<sup>۹</sup> پادشاه

گفت: ”اگه کُدم کس تُوره يَگو چِيز گفت، او ره دَپیش ازمه بَیر و او دِیگه تُوره غَرض نَمِیگِيره.“<sup>۱۱</sup> او خته خاتُو گفت: ”آی پادشاه، دَخُداوند، خُدای خُو قَسم ياد کُو، تا إنتِقام گِيرنده خُون دِیگه کُشتار نَکنه؛ نَشْنَه که باچِه دِیگه مه ام از بَین بوره.“ پادشاه گفت: ”دَزِندگی خُداوند قَسم که يَگ مُوى سرِ باچِه تُوا م دَزمى نَموفته.“

او خته خاتُو گفت: ”لطفاً کَنِیز خُوره إجازه بَدی که يَگ توره ره دَبادار خُو پادشاه بُکیه.“ او گفت: ”بُگی.“<sup>۱۲</sup> خاتُو گفت: ”پس چرا تُو دَخلافِ قَوم خُدا امي رقم يَگ نقَشه کشیدَي؟ چُون پادشاه قد گُفتون امزى توره خود ره محَکوم مُونه، چراکه پادشاه باچِه آواره شُدِه خُوره پس نُورده.<sup>۱۳</sup> يَگ روز نَه يَگ روز پَگ مو باید بُمری، چُون مو رقم آوى اَستَى که دَزمى لَوْو شُدَه و پس جَم نَمُوشَه. ليکن خُدا جان ره نَمِیگِيره، بلکه راه های ره جور مُونه که نفر آواره شُدَه بلده همیشه از حُضُور ازو دُور نَمَنه.<sup>۱۴</sup> دلیلی که آلى ما اَمدُم تا امي توره ره دَبادار خُو پادشاه بُگیم، اي اَستَه که مردم مَره تَرسَند؛ ولی کَنِیز تُو قد خود خُوفِکر کده گفت، ’ما قد پادشاه گپ مِیزَنُم؛ شاید پادشاه تقاضای کَنِیز خُوره دَجای بَیره.<sup>۱۵</sup>

چُون پادشاه قبُول مُونه که کَنِیز خُوره از دِستِ کسی که میخایه مه و باچِه مَره يَگجاي از میراثِ خُدا نابُود کنه، نِجات بَدیه.<sup>۱۶</sup> امچُنان کَنِیز تُو قد خود خُو گفت، ’توره بادار مه پادشاه باعِثِ آرامِش مه مُوشَه، چراکه بادار مه پادشاه رقم ملايکه خُدا اَستَه و خُوب و بَدره فرق مُونه‘، و آلى خُداوند، خُدای تُو قد تُو بشَه.“<sup>۱۷</sup>

او خته پادشاه دَخاتُو گفت: ”هر چِيز ره که از تُو سوال مُونم، از مه تاشه نَگو.“<sup>۱۸</sup> خاتُو گفت: ”امر کُو بادار مه پادشاه.“<sup>۱۹</sup> پادشاه گفت: ”آیا دِستِ يوآب دَپَگ امزى کارا قد از تُو يَگ نَییه؟“ خاتُو دَجواب شَی گفت: ”آی بادار مه پادشاه، دَزِندگی تُو قَسم که هیچ کس از چِيزی که بادار مه پادشاه بُکیه، طرفِ راست یا چَپ تاو خورده نَمیتَه. اَرى، خِدمتگار تُو يوآب بُود که دَز مه اَمر کد و او بُود

که پگ امزی تورا ره دان کنیز تُو آندخت. <sup>۲۰</sup> بلده تغییر ددون شکل قضیه،  
یوآب خدمتگار تُو امی کار ره کد، لیکن حکمت بادار مه رقم حکمت ملایکه خدا  
یه و بادار مه تمام چیزای ره که د زمی آسته مُفامه.“

<sup>۲۱</sup> پس پادشاه د یوآب گفت: ”اینه، ما امی خاهش ره قبول کدم. آلی بورو و  
آبشالوم باچه مره بیر.“ <sup>۲۲</sup> یوآب خود ره قد روی خُو د زمی آندخته احترام کد و  
پادشاه ره دعا و ثنا کده گفت: ”آی بادار مه پادشاه، امروز خدمتگار تُو فامید  
که نظر لطف تُو د بله مه آسته، چراکه پادشاه تقاضای خدمتگار خُو ره د جای  
آورد.“

<sup>۲۳</sup> پس یوآب باله شده د جشور رفت و آبشالوم ره د اورشلیم آورد. <sup>۲۴</sup> لیکن  
پادشاه گفت: ”او باید د خانه خود خُو بوره و روی ازمه ره ننگره.“ پس آبشالوم  
د خانه خود خُو رفت و روی پادشاه ره ندید.

<sup>۲۵</sup> د تمام إسرائیل هیچ کس نبود که از نوریندی شی رقم آبشالوم تعریف و  
توصیف شنے؛ از قف پای تا تولғه سر شی دزو عیب وجود نداشت. <sup>۲۶</sup> هر وختیکه  
او مُوی سر خوره کم مُوکد، -- او د آخر هر سال مُوی خُوره کم مُوکد، یعنی  
هر غیتیکه د سر شی گرنگی مُوکد، او ره کم مُوکد -- او مُوی سر خُوره وزن  
مُوکد و د مطابق وزن شاهی دوصد مثقال مُوشد. <sup>۲۷</sup> بلده آبشالوم سه باچه و یگ  
دُختر د دنیا آمد که نام دُختر شی تamar بود. او یگ دُختر نوریند بود.

<sup>۲۸</sup> آبشالوم دو سال کامل د اورشلیم زندگی کد و روی پادشاه ره ندید. <sup>۲۹</sup> اوخته  
آبشالوم بلده گوی کدون یوآب نفر ری کد تا او ره د پیش پادشاه ری کنه، لیکن  
یوآب نخاست که د پیش ازو بیبه. او دفعه دوام نفر ری کد، لیکن یوآب  
نخاست که بیبه. <sup>۳۰</sup> اوخته آبشالوم د خدمتگارای خُو گفت: ”توخ کنید، زمین  
یوآب د پالوی زمین ازمه آسته و د اونجی جو کشت کده. بورید و او ره آتش  
بزنید.“ پس خدمتگارای آبشالوم زمی ره آتش زد.

<sup>۳۱</sup> یوآب باله شُدَه دَ پیشِ آبِشالوم دَ خانه شی آمد و دَزُو گفت: ”چرا خدمتگارای تُو زمین مَره آتش زَده؟“ <sup>۳۲</sup> آبِشالوم دَ جوابِ یوآب گفت: ”توخ کُو، ما دَز تُو پیغام رَبِّی کده گفتُم، اینجی بیه تاکه تُوره دَ پیشِ پادشاه رَبِّی کنُم و تُو پُرسان کنی که، ”چرا ما از جِشور آمدیم؟ بلده مه بهتر بُود که تا آلی ره دَ امونجی مُونَدُم!“ پس آلی مَره بیل که رُوی پادشاه ره بِنگرم و اگه کُدم گناه از مه سر زَده بشَه، بیل که مَره بُکْشه.“

<sup>۳۳</sup> اوخته یوآب دَ پیشِ پادشاه رفت و امی توره ره دَزُو گفت؛ و او آبِشالوم ره کُوي کد. پس آبِشالوم آمده دَ حُضُورِ پادشاه قد رُوی خُو دَ زمی افتده احترام کد و پادشاه آبِشالوم ره ماخ کد.

## نقِشِ آبِشالوم بلده سورِش

<sup>۱</sup> بعد از چند وقت آبِشالوم یگ گاڈی جنگی و چند آسپ پیدا کد و پِنجاه نفر که پیشلوں شی مُودوید. <sup>۲</sup> آبِشالوم هر روز صَباخگاه باله مُوشُد و دَ بغل راه درگِه شار ایسته مُوشُد؛ اوخته هر کسی که یکو دعوا میداشت و دَ پیشِ پادشاه بلده فیصله کدو میمَد، آبِشالوم او ره کُوي کده مُوگفت: ”از کُدم شار آستی؟“ وختی او نفر مُوگفت: ”خدمتگار تُو از فلان طایفه إسرائیل آسته.“ <sup>۳</sup> آبِشالوم دَز شی مُوگفت: ”توخ کُو، دعوای تُوبَرق و دُرُست آسته، لیکن از طرفِ پادشاه هیچ کس نییه که توره تُو ره بِشنوه.“ <sup>۴</sup> و آبِشالوم ادامه دده مُوگفت: ”کشکه ما قاضی امزی سرزمی مُویوَدُم! اوخته هر کسی که یکو عرض یا دعوا میداشت، دَ پیشِ ازمه میمَد و ما دَ حق ازو انصاف مُوکدم.“ <sup>۵</sup> وختی یکو کس دَ نزدِیک ازو میمَد که دَزُو احترام کنه، او دِست خُوره دراز کده او ره دَ بغل خُو میگرفت و ماخ مُوکد. <sup>۶</sup> آبِشالوم قد تمامِ إسرائیلی های که دَ پیشِ پادشاه بلده قضاوت میمَد امی رقم رفتار مُوکد؛ پس آبِشالوم دِلِ مردمِ إسرائیل ره دَ دِست آورد.

<sup>٧</sup> بعد از تیر شُدونِ چار سال آبِشالوم دَ پادشاه گفت: ”لطفاً دَز مه إجازه بَدی که دَ حِبرون بُورُم و نَدری ره که بَلده خُداوند گِرفتیم، پُوره کُنم.<sup>٨</sup> چُون ما خِدمتگار تُو وختیکه دَ جِشورِ ارام زِندگی مُوكِدُم يگ نَدر گِرفته گُفتُم، اگه خُداوند مَره پس دَ اورُشَلیم بُرد، ما خُداوند ره دَ حِبرون عِبادت مُونُم.“<sup>٩</sup> پادشاه دَز شی گفت: ”بَخِير-و-سلامَت بُورُو.“ پس او باله شُده دَ حِبرون رفت.

<sup>١٠</sup> لیکن آبِشالوم قاصِدا ره تاشکی دَ پیشِ تمام طایفه های إسرائیل رَیی کده گفت: ”امی که آوازِ شِپیور ره شِنیدید، بُگید، آبِشالوم دَ حِبرون پادشاه شُده!“<sup>١١</sup> دُو صد نفر از اورُشَلیم قد آبِشالوم قَتی رفت، چُون اُونا دعوَت شُدد؛ و اُونا دَ دلِ پاک رفت و از هیچ چِيز خبر نَداشت.<sup>١٢</sup> دَ حالیکه آبِشالوم قُربانی ها ره تقديم مُوكد، اُو بَلده کُوي کدونِ أَخِيتوفِلِ جِيلونی مُشاورِ داؤود نفر رَیی کد که از شار خُو جِيلو بییه. دَ امزی رقم نَقشِ خیانت قَوی شُده مورفت و مردُمی که قد آبِشالوم يگجای مُوشُد روز دَ روز کَلو مُوشُد.

## داؤود از اورُشَلیم دُوتا مُونه

<sup>١٣</sup> يگ نفر دَ پیشِ داؤود آمد و دَزُو گفت: ”دل های مردُم إسرائیل از پُشتِ آبِشالوم رفتَه.“<sup>١٤</sup> اوخته داؤود دَ پگ خِدمتگارای خُو که قد ازو دَ اورُشَلیم بُود، گفت: ”باله شِنید که امی آلى دُوتا کنی، اگه نَه، مو از پیشِ آبِشالوم دُوتا نَمیتنی. عَجله کِنید که بوری، نَشنُه که اُو دَ زُودی دَز مو بِرسه و دَ بله مو بَلا-و-مُصِيبَت اُورده شار ره قد دَم شمشیر بِزنَه.“<sup>١٥</sup> خِدمتگارای پادشاه دَزُو گفت: ”اینه، خِدمتگارای تو حاضر-و-آماده آسته تا هر چِيزی که بادار مو پادشاه تصمیم بِگیره، اُو ره انجام بَدیه.“<sup>١٦</sup> پس پادشاه رَیی شُد و تمام خانوار شی از پُشتِ ازو حرَکت کد، لیکن پادشاه دَه خاتون خُو ره که کِنیز شی بُود، دَ خانه ایشت تا از خانه نِگاهوانی کنه.<sup>١٧</sup> پادشاه پیش رفت و تمام مردُم از پُشت شی حرَکت کد و اُونا دَ آخرین خانه شار ایسته شُد.<sup>١٨</sup> اوخته تمام خِدمتگارای پادشاه دَ شُمولِ پگ

کریتیا و پگِ فلیتیا دُو بَغل شی تیر شُد و تمامِ شش صد نفرِ جَتی که از جَت از پُشتِ پادشاه آمدُد، دَ پیشِ رُوى شی رفت.

<sup>۱۹</sup> اوخته پادشاه دَ اتای جَتی گفت: ”چرا تو ام قد ازمو میبی؟ پس بورُو و قد پادشاه بشی، چراکه تو یگ خارجی آستی و از مُلک خُو ام جلای وطن شُدی.

<sup>۲۰</sup> تو دیروز آمدی؛ آیا ما امروز تُوره قد خود خُو آواره کنُم؟ ما مورُم، ولے معلوم نیبیه که دَ کُجا مورُم. پس بورُو و قومای خُوره ام قد خُوبُر. دُعا مُونم که خُداوند مُحبَت و وفاداری خُوره نصِيب تُوكنه.“

<sup>۲۱</sup> لیکن اتای دَ جوابِ پادشاه گفت: ”دَ زندگی خُداوند و دَ زندگی بادار مه پادشاه قسم که دَ هر جای که بادار مه پادشاه بشه، چی دَ اونجی مرگ بشه، چی زندگی، خدمتگار تُوا م دامونجی آسته.“ <sup>۲۲</sup> داؤود دَ اتای گفت: ”خوبیه، بیه و پیش بورُو.“ پس اتای جَتی قد پگِ نفای خُو و تمامِ بچکیچای که قد ازو بُود، پیش رفت.

<sup>۲۳</sup> غَیتیکه پگِ مردم تیر شُد، تمامِ باشنده های سرزمینِ اسرائیل دَ آوازِ بلند چخرا کد؛ پادشاه از درهِ قِدرون تیر شُد و تمامِ مردم سُونِ بیابو حَركت کد.

<sup>۲۴</sup> صادوق پیشوا ام آمد و پگِ لاویای که قد ازو بُود صندوقِ عهدِ خُدا ره مُویرد. وختی اونا صندوقِ خُدا ره تاه ایشت، آبیاتار قُربانی تقدیم کده رفت تا غَیتیکه پگِ مردم از شار بُر شُدۀ خلاص شُد.

<sup>۲۵</sup> اوخته پادشاه دَ صادوق گفت: ”صندوقِ خُدا ره پس دَ شار بُر. اگه خُدا دَ بله مه نظرِ لطف کد، او مره پس میره و دَز مه اجازه میدیه که ام صندوق و ام جایگاهِ شی ره بِنگرم.<sup>۲۶</sup> لیکن اگه مُوگیه: ’ما از تُوراضی نیستُم،‘ بیل که هر چیزی که دَ نظرِ ازو خُوب معلوم مُوشه، امُوره دَ حق مه انجام بَدیه.“

<sup>۲۷</sup> پادشاه ادامه دَده دَ صادوق پیشوا گفت: ”آیا تو غَیبگوی نیستی؟ بَخَیر-و-سلامت پس دَ شار بورُو! دُو باچه شُمو ام قد شُمو قَتی بوره، ام آخِيمَعَص باچه

ازْتُو و ام یوناتان باچه آبیاتار.<sup>۲۸</sup> توخ کُو، ما د بیابو د جایی که آوِ دریا کم آسته معطل مُونم تا پیغام شُمو دَز مه بر سه و ما از اوضاع باخبر شُنم.<sup>۲۹</sup> پس صادوق و آبیاتار صندوق خُدا ره پس دَ اورُشَلَیم بُرد و اونا د امونجی مَند.

<sup>۳۰</sup> لیکن داؤود سُون باله د کوه زَیتون رفت، و د حالیکه مورفت چخرا مُوكد؛ سر ازو پوشیده بُود و پای شی لُچ، و تمام مردمی که قد شی قتی بُود ام سرهای خُو ره پوشند و چخرا کده مورفت.<sup>۳۱</sup> د امزُو غَیت د داؤود گفته شُد که: ”آخِيتوفل ام د مینکل امزُو خیانتکارا آسته که قد ابَشالوم یگجای شُده.“ اوخته داؤود گفت: ”آی خُداوند، مشوره آخِيتوفل ره بَلده ابَشالوم احمقانه معلوم کُو.“

<sup>۳۲</sup> وختی داؤود دَبله کوه رسید، د جایی که مردم خُدا ره عبادت مُوكد، او دید که حُوشای ارکی قد کالای چکچک و سرِ خاکپُر دَدم راه شی آمد.<sup>۳۳</sup> داؤود دَزُو گفت: ”اگه قد ازمه بوری، بار گردون مه مُوشی؛<sup>۳۴</sup> لیکن اگه پس د شار بوری و د ابَشالوم بُگی: ”آی پادشاه، ما خدمتگار تُو مُوشُم. امُورِ رقم که د ساپِق خدمتگار آته تُو بُودُم، آلی خدمتگار ازْتُو مُوشُم.“ اوخته تُو میتنی که مشوره آخِيتوفل ره بَلده مه باطل کنی.<sup>۳۵</sup> صادوق پیشوا و آبیاتار پیشوا ام د اونجی قد تُو آسته. هر چیزی که از خانه پادشاه شنیدی، او ره د صادوق پیشوا و آبیاتار پیشوا بُگی.<sup>۳۶</sup> اونه، دُو باچه ازوا آخِيمَعَص باچه صادوق و یوناتان باچه آبیاتار ام د اونجی قد ازوا آسته. هر چیزی که شنیدی، د وسیله ازوا دَز مه رَی کُو.“

<sup>۳۷</sup> پس حُوشای رفیق داؤود د شار رسید و ابَشالوم ام د اورُشَلَیم داخل شُد.

## داؤود و صِبِیَا

<sup>۱۶</sup> <sup>۱</sup> وختی داؤود از سر کوه کم وری او طرف تیر شُد، دید که صِبِیَا خدمتگار مِفِیبوشت قد یگ جوره ألاعَض پالون شُد که دُو صد دانه نان، صد دانه کیک

کِشْمِشِی، صَدْ دَانَه کِیکِ انجِیرِی و یَگِ مشَکِ شَرَابِ انْگُورَ بَلَه ازْوا بَارُ بُود، دَدَمِ رَاهِ شَیْ أَمَد.<sup>۲</sup> پَادِشاَه دَ صِيَباً گَفت: ”اَمِی چِيزَا رَه اَزْ چِی خَاطِرَ اُورَدَی؟“ صِيَباً گَفت: ”اَمِی اُلاَغاَ بَلَه خَانَوارِ پَادِشاَه اَسْتَه کَه سَوَارِ شُنَه و نَانِ و انجِيرَ بَلَه خُورَاكِ خِدمَتَگَارَا و شَرَابِ انْگُورَ بَلَه ُچِی کَدونِ کَسَای کَه دَ بِياَبُو مَنَدَه شُدَه.“<sup>۳</sup> پَادِشاَه گَفت: ”بَاقِه بَادَارَ تُو كُجَا اَسْتَه؟“ صِيَباً دَ پَادِشاَه گَفت: ”اُو دَ اوْرُشَلَيمِ شِشَتَه، چُون اُو مُوْگِيَه کَه، اِمِروْز خَانَوارِ اِسْرَائِيلِ پَادِشاَهِي بَابِه مَرَه دَزْ مَه پَس مِيدِيه.“<sup>۴</sup> اوْختَه پَادِشاَه دَ صِيَباً گَفت: ”آلِي تَمامِ مَال-و-دَارَايِي مِفَيْبُوشِت اَزْ تُو بَشَه.“ صِيَباً گَفت: ”نوْكَر تُو اَسْتُم، آَى بَادَارَ مَه پَادِشاَه، بَيْلَه نَظَرِ لُطْفِ تُو دَ بَلَه مَه يَشَه.“<sup>۵</sup>

## شِمعِي دَأْوُود رَه دَوْكَري مُونَه

<sup>۶</sup> وَخْتِيكِ دَأْوُود پَادِشاَه دَ بَحُورِيمِ رسِيد، دَأُونِجي يَگِ نَفَر اَزْ اَولَادِ بَابِه خَانَوارِ شَائِول دَ نَامِ شِمعِي بَاقِه جِيرا بُرُ شُدَه اَمَد. اُو دَ حَالِيكِه مِيمَد، دَوْكَري مُوكَد. اُو دَأْوُود و پَگِ خِدمَتَگَارَايِ دَأْوُود پَادِشاَه رَه قَدْ سَنَگِ مِيزَد، باَوْجُودِ کَه تَمامِ مرْدُم و پَگِ مَرَدَايِ جَنَگِي دَ طَرَفِ رَاستِ و طَرَفِ چَپِ دَأْوُود قَرار دَشت. شِمعِي دَوْكَري کَده اَينَى رقمِ مُوْگَفت: ”گُمْ شُو! گُمْ شُو! آَى مَرَدِ خُونَى و آَى مَرَدِ بَيْرَزِش!“<sup>۷</sup> خُداونَدِ اِنتِقامِ خُونِ تَمامِ خَانَوارِ شَائِول رَه کَه تُو دَ جَايِ شَيِّي پَادِشاَهِي کَدَى اَزْ تُو گِرفَته و خُداونَدِ پَادِشاَهِي رَه دَ دَسَتِ بَاقِه تُو اَبَشَالَومِ تَسْلِيمِ کَده. توْخِ كُو، بَلا-و-مُصِيبَتِ دَ بَلَه تُو اَمَدَه، چِراَكِه تُو يَگِ مَرَدِ خُونَى اَسْتَى.“

اوْختَه اَبِيشَايِ بَاقِه صَرُوَيِه دَ پَادِشاَه گَفت: ”چِرا اَيِ سَكِ مُرَدَه بَادَارَ مَه پَادِشاَه رَه دَوْكَري کُنه؟ اِجازَه بَدَى کَه بُورُم و سَرِ شَيِّي رَه اَزْ تَنِ شَيِّي جَدا کُنم.“<sup>۸</sup> لِيَكِنِ پَادِشاَه گَفت: ”آَى بَاقِه هَايِ صَرُوَيِه، شُمُو رَه دَزْ مَه چِي غَرضِ اَسْتَه؟ بَيْلَيدِ کَه دَوْكَري کَنه، چُون اَگَه خُداونَدِ دَزُو گَفَته کَه، دَأْوُود رَه دَوْكَري کُو، پَس کَيِ اَسْتَه کَه بُكَيِّه، چِرا اَيِ کَارِ رَه مُونَى؟“<sup>۹</sup> و دَأْوُود دَ اَبِيشَايِ و تَمامِ خِدمَتَگَارَايِ خَو

گفت: ”اونه، باچه خود مه که از پُشتِ کمر مه دَ وجود آمده، قَصدِ گِرفتونِ جان مَره دَرَه؛ پس چِیقس کَلوتر امی بِنیامِینی ای قَصد ره دَشته بشه! او ره تنها ايله کَنید و بِیلید که دَوکري کنه، چُون خُداوند دَزُو آمر کده.<sup>۱۲</sup> شاید خُداوند دَ مُصِيبت مه نظر کنه و خُداوند دَ عِوضِ دَوکري که امروز ای نفر مُونه، دَز مه آجرِ خُوب بِديه.“<sup>۱۳</sup> پس داؤود و نفراي شى دَ راهِ خُو ادامه دَد و شِمعي از بغلِ کوهى که رُوى دَ رُوى ازوا بُود رفت و دَ حاليكه مورفت، دَوکري کده او ره قد سنگ مِيزَد و خاک باد مُوكد.<sup>۱۴</sup> پادشاه و تمام مردمى که قد ازو بُود، مَنده-و-زَلَه دَ دریای اُرْدُن رسِيد و دَ اونجى مندگى گِرفت.

## مشورهِ أخِيتوفِل دَ أَبْشالوم

<sup>۱۵</sup> دَ امزُو غَيت که أَبْشالوم و پَگِ مردای إسرائیل دَ اورُشَلَيمَ آمد، أخِيتوفِل ام قد شى قَتى بُود.<sup>۱۶</sup> وختى حُوشای أرکى، رفِيقِ داؤود دَ پیشِ أَبْشالوم آمد، حُوشای دَ أَبْشالوم گفت: ”زِنده باد پادشاه! زِنده باد پادشاه!“<sup>۱۷</sup> أَبْشالوم دَ حُوشای گفت: ”آيا وفادارى تُو بَلَدِه رفِيق تُو امي بُود؟ چرا قد رفِيق خُونَرَفتى؟“<sup>۱۸</sup> حُوشای دَ أَبْشالوم گفت: ”نه، بلکه کسى ره که خُداوند و امي مردم و پَگِ مردای إسرائیل انتِخاب کده، ما خِدمتگار امزُو آسْتُم و دَ پیشِ امزُو باقى مُومِنُم.<sup>۱۹</sup> علاوه ازى، ما کى ره باید خِدمت کُنم؟ آيا نباید باچه شى ره خِدمت کُنم؟ أرى، امُورِ رقم که ما دَ خِدمتِ آته تُو بُودُم، امُورِ رقم دَ خِدمتِ ازْتُو ام آسْتُم.“

<sup>۲۰</sup> اوخته أَبْشالوم دَ أخِيتوفِل گفت: ”تُو دَز مو مشوره بِدى؛ مو چِيز کار کنى؟“<sup>۲۱</sup> أخِيتوفِل دَ أَبْشالوم گفت: ”قد خاتُونوی آته خُو که او بَلَدِه نگاهوانى خانه ايشته، خاو کُو؛ وختى تمام إسرائیل بِشنوھ که تُو دَ نظرِ آته خُو بَد شُدَى، اوخته دِستِ تمامِ کسای که قد تُو آسته، قُوت پَيدا مُونه.“<sup>۲۲</sup> پس اونا دَبله بام بَلَدِه أَبْشالوم يَگ خَيمَه زَد و أَبْشالوم دَ پیشِ چِيمِ تمامِ بنى إسرائیل قد خاتُونوی آته خُو خاو کد.<sup>۲۳</sup> مشوره که أخِيتوفِل دَ امزُو روزا مِيدَد، رقم ازى بُود که يَگو کس از خُدا هِدایت

طلب کنه. پس هر مشوره آخیتوفل ام بلده داؤود و ام بلده آبشالوم امی رقم با آرژش بود.

## هُوشای مشوره آخیتوفل ره باطل مونه

۱۷ آخیتوفل د آبشالوم گفت: ”دز مه اجازه بدی که دوازده هزار نفر ره انتخاب کنم و باله شده امشاو د دمبال داؤود بورم.<sup>۲</sup> د حالیکه او منده آسته و روحیه شی از دست رفته، ما د بله ازو میرسم و او ره وحشت زده مونم و تمام مردمی که قد شی آسته دوتا مونه؛ اوخته تنها پادشاه ره موكشم<sup>۳</sup> و تمام مردم ره دویاره د پیش از تو میرم؛ چون مردی ره که تو طلب مونی، مرگ ازو باعث پس آمدنون پگ موشه و تمام قوم د صلح-و-امنیت زندگی مونه.“<sup>۴</sup> ای توره د نظر آبشالوم و تمام ریش سفیدای إسرائیل خوب معلوم شد.

۵ اوخته آبشالوم گفت: ”هُوشای آركی ره ام کوی کنید تا ازو ام بشنوی که او چیزخیل موگیه.“<sup>۶</sup> وختی هُوشای د پیش آبشالوم آمد، آبشالوم دزو گفت: ”آخیتوفل اینی رقم گفته، آیا مطابق گفته ازو عمل کنی؟ اگه موگی نه، تو نظر خو ره بگی：“

۷ هُوشای د آبشالوم گفت: ”مشوره ره که آخیتوفل ایدفعه دده، خوب مشوره نییه.“<sup>۸</sup> و هُوشای ادامه دده گفت: ”تو میدنی که آته تو و نفرای شی مردای جنگی آسته و رقم خرسی که چوچه های شی د بیابو از شی گرفته شده بشه سر قار آسته. علاوه ازی، آته تو آدم جنگ دیده آسته، او شاو ره د مینکل مردم تیر نمونه.<sup>۹</sup> بدَن که امی الی او خود ره د یکو غار یا یکو جای دیگه تاشه کده. و اگه ایطور شنه که بعضی نفرای ازمو د شروع جنگ کشته شده بوفته، اوخته هرکسی که ای ره بشنوه، موگیه، د مینکل لشکری که از آبشالوم پیروی مونه، یگ کشتار شده.<sup>۱۰</sup> و آدم دلیری که دل شی رقم دل شیر بشه، کاملاً بی جرأت موشه، چون

تمامِ إسرائیل میدنه که آته تو یگ مردِ جنگی أسته و کسای ام که قد شی أسته مردای دلیر.<sup>۱۱</sup> پس نظرِ ازمه ای أسته که تمامِ مردمِ إسرائیل از دان تا بئیرشیبَع که رقمِ ریگِ دریا الی بے حسابِ أسته، دَ پیشِ ازْتُو جَم شُنَه و جنابِ خود تُو اونا ره دَ جنگ رهبری کُنی.<sup>۱۲</sup> اوخته دَ هر جای که او پیدا شُنَه دَ جان شی موری و رقمی که شبنم دَ بلَه زمی میریزه دَ بلَه ازُو تاه مُوشی و اُو و پگِ کسای که قد ازو أسته یگ شی زنده نَمُومَنَه.<sup>۱۳</sup> و اگه او دَ مَنَه يکو شار عَقَب نِشینی کنه، اوخته تمامِ إسرائیل رسپونا ره دَ امزُو شار میره و مو اُو ره کش کده دَ درَه میندَزی تا یگ سنگِ ریزه ام دَ امزُو جای باقی نَمَنَه.<sup>۱۴</sup> پس أَبْشَالُوم و تمامِ مردایِ إسرائیل گفت: ”مشورهِ حُوشای اُرکی از مشورهِ أَخِيَّتُوْفِل کده بهترِ أَسْتَه.“ چون خُداوند تصمیمِ گرفتُ که مشورهِ خُوبِ أَخِيَّتُوْفِل ره باطل کنه تا تباھی ره دَ بلَه أَبْشَالُوم بیله.

<sup>۱۵</sup> اوخته حُوشای دَ صادوق پیشوا و أَبْيَاتَار پیشوا گفت: ”أَخِيَّتُوْفِل دَ أَبْشَالُوم و ریش سفیدایِ إسرائیل اینی رقم و اینی رقم مشوره دَده و ما اینی رقم و اینی رقم مشوره دَدیم.<sup>۱۶</sup> پس الی دَ زُودی نفر رَبِی کُو و دَ داؤود خبر دَده بُگی، ’امشاو دَ جایی که آوِ دریا کم أَسْتَه نَشَنَی، بلکه هر رقم که مُوشَه او طرف تیر شُو؛ اگه نَه، پادشاه و تمامِ کسای که قد شی أَسْتَه، نابُود مُوشَه.“<sup>۱۷</sup> یوناتان و أَخِيَّمَعَصَ دَ عین-روگل مُنْتَظِر میششت و یگ کنیزِ آمدَه دَزوا خبر میورد و اونا رفته خبر ره دَ داؤود پادشاه میرسند، چون اونا بخاطری که دیده نَشَنَه، دَ شار داخِل نَمُوشُد. <sup>۱۸</sup> لیکن یگ جوان اونا ره دید و دَ أَبْشَالُوم خبر دَد. پس اونا هر دُوی شی دَ زُودی رفت و دَ خانه یگ نفر دَ بَحُورِیم داخِل شُد که دَ مَنَه حَولَی ازو یگ چاه بُود و اونا دَ مَنَه امزُو چاه تاه شُد.<sup>۱۹</sup> خاتُونِ صاحِبِ خانه یگ چیز ره گرفته دَ دانِ چاه آوار کد و دَ سر شی غَلَه-و-دانه پاش دَد تا چیز معلوم نَشَنَه.<sup>۲۰</sup> وختی خدمتگارایِ أَبْشَالُوم دَ پیشِ امزُو خاتُو دَ خانه آمد، اونا گفت: ”أَخِيَّمَعَصَ و یوناتان کُجا یَه؟“ خاتُو دَزوا گفت: ”أُونا از جوی آو تیر شُدَه رفت.“ پس وختیکه اونا پالید و امو دُو ره پیدا نَتَنَست، اونا پس دَ اورُشَلَیم رفت.

<sup>۲۱</sup> بعد از رفتوں ازوا، امودو از چاه بُر شُد و رفته داُوود پادشاه خبر دد. اونا داُوود گفت: ”باله شنید و د زودی از آو تیر شنید، چراکه آخیتوفل د باره شمو اینی رقم مشوره دده.“ <sup>۲۲</sup> پس داُوود و تمام مردمی که قد شی قتی بود، باله شده از دریای اردن تیر شد و تا دم روز واژ شدو یکی ازوا ام باقی نماند که از دریای اردن تیر نشده بشه.

<sup>۲۳</sup> وختی آخیتوفل دید که مشوره شی عملی نشد، او لاغ خوره پالو کد و باله شده د شار خود خود د خانه خورفت. د اونجی او کارای خانه خوره سر-و-سامان دد و بعد ازو خود ره دار زد. پس او مُرد و د قبر آته خور دفن شد.

<sup>۲۴</sup> اوخته داُوود د مَحَنَائِيمَ آمد و آبصالوم قد تمام مردای إسرائیل از دریای اردن تیر شد. <sup>۲۵</sup> د امزو غیت آبصالوم عَمَاسَا ره د جای یوآب قومَدانِ لشکر مُقرر کدد؛ عَمَاسَا باچه یگ نفر د نام یتراى إسرائیلی بُود که یترا قد آبیجايل دُختِنا حاش خوار صَرُویه توی کدد؛ صَرُویه آبه یوآب بُود. <sup>۲۶</sup> پس آبصالوم و إسرائیلی ها د سرزمینِ جِلعاد خیمه زد.

<sup>۲۷</sup> وختیکه داُوود د مَحَنَائِيمَ رسید، شویی باچه ناحاش از رَبَتِ عمونیا، ماکیر باچه عَمِئیل از لو-دبار و بَرْزِلَای جِلعادی از روگلیم <sup>۲۸</sup> بستره ها، کاسه ها و ظرفای گلی ره قد گندم، جو، آرد، غله بُریو شده، لوبیا، عَدَس، نَخود بُریو شده، <sup>۲۹</sup> عسل، قیماق، گوسپو و پنیر گاوی بلده خوراک داُوود و مردمی که قد شی بُود آورد، چون اونا گفت: ”مردم د امزی بیابو گشنه و تُشنه و مَنده-و-زله أسته.“

## مرگِ آبصالوم

<sup>۱۸</sup> <sup>۱</sup> داُوود مردای ره که قد شی بُود، جم کد و د بله ازوا قومَدانای هزار نفری و قومَدانای صد نفری تعیین کد. <sup>۲</sup> داُوود لشکر ره د سه دسته ری کد: یگ دسته

ره زیرِ قومَنده يوآب، يگ دسته ره زيرِ قومَنده آبيشاي براي يوآب باچه صرُويه و يگ دسته ره زيرِ قومَنده اتاي جتى. اوخته پادشاه دلشکر گفت: "ما خود مه ام قد شُمو موْرم".<sup>۴</sup> ليکن لشکر گفت: "تو نباید بورى، چون اگه مو دوتا کنى بلده ازوا هیچ اهمیت نداره؛ حتی اگه نیم ازمو بُمری، باز ام بلده ازوا هیچ اهمیت نداره. ليکن تو برابر ده هزار ازمو آرژش دری؛ پس بهتر استه که تو د شار بُمنی و دز مو کومک رئی کنى".<sup>۵</sup> پادشاه دزوا گفت: "هر رقم که د نظر شُمو خوب معلوم مُوش، ما امو رقم مُونم". پس پادشاه د بغل درگه شار ایسته شُد و تمام لشکر د دسته های صد نفری و هزار نفری حرکت کد.<sup>۶</sup> پادشاه د يوآب، آبيشاي و اتاي امر کده گفت: "قد آبشالوم باچه مه بخاطر ازمه دَنرمی رفتار کنید". و ختيكه پادشاه د پگِ قومَنداها د باره آبشالوم دستور دد، تمام لشکر شنید.

<sup>۷</sup> پس لشکر د جنگِ إسرائیل د صحرا رفت و جنگ د جنگلِ إفرايم دَر گرفت.<sup>۸</sup> لشکرِ إسرائیل از پيشِ خدمتگاراي داؤود شکست خورد و دَامزو روز کشتار کله دَأونجي رُخ دَد و بيسٽ هزار نفر کشته شُد.<sup>۹</sup> جنگ د تمام منطقه تیت شُد و تعدادِ کسای که دَامزو روز د وسیله جنگل کشته شُد، کلوتر از کسای بُود که قد دم شمشیر کشته شُد.

<sup>۱۰</sup> دَامزو غیت آبشالوم قد خدمتگاراي داؤود رُوى دَرُوى شُد. آبشالوم د بله قاطر سوار بُود و قاطر د زيرِ شاخه های يگ درختِ بُلوطِ کله دَرامد و سر ازو د شاخه های درختِ بُلوط بند مَند. دَحالِيكه او د مينكلِ آسمو و زمی اوزو مَند، قاطری که د تَی پای شی بُود پيش رفت.<sup>۱۱</sup> يگ نفر او ره دید و د يوآب خبر دَد گفت: "اونه، ما دیدم که آبشالوم د يگ درختِ بُلوط اوزو مَند".<sup>۱۲</sup> يوآب د نفری که دزُو خبر اُوردد گفت: "واقعاً او ره دیدی؟ پس چرا او ره دَامونجي کشته د زمی نَزَدی تا ما دز تُو دَ مِثقال نُقره و يگ كمرَند مِيدَدم؟"<sup>۱۳</sup> ليکن امو نفر د يوآب گفت: "اگه هزار مِثقال نُقره ام د دست مه دَده مُوشُد، ما دست خُوره د بله باچه پادشاه دراز نَمُوكدم، چون پادشاه دز تُو و آبيشاي و اتاي دَحالِيكه مو

گوش مُوكدی امر کده گفت، 'بخارتر ازمه از آبشالوم باچه مه حفاظت کنید.'<sup>۱۳</sup> و اگه ما خیانتکارانه رفتار کده جان ازو ره میگرفتم -- چون هیچ چیز از پادشاه تاشه نمومنه -- اول خود تو د ضد مه ایسته موشدی."<sup>۱۴</sup> اوخته یواب گفت: "ما نمیتنم وقت خوره قد از تو ای رقم ضایع کنم." پس سه دانه نیزه ره دست خو گرفت و د دل آبشالوم زد د حالیکه او هنوز د مینکل شاخه های بلوط زنده بود.<sup>۱۵</sup> بعد ازو ده مرد جوان که سلاح-بردارای یواب بود د گرد آبشالوم جم شد و او ره زده کشت.

<sup>۱۶</sup> اوخته یواب شیپور ره د صدا او رد و لشکر از دمبال کدون اسرائیل پس تاو خورد، چراکه یواب لشکر ره منع کد.<sup>۱۷</sup> اونا جسد آبشالوم ره گرفته دیگ چقوری کله که د جنگل بود، پورته کد و دبله ازو یگ سنگ-قلچه غدر کله جور کد. د عین حال پگ لشکر اسرائیل د خانه های خود دوتا کد.<sup>۱۸</sup> آبشالوم د غیت زندگی خو یگ مnar بلده خو ایستاجی کدد که د دره پادشاه استه، چون او گفت: "ما باچه ندرم که نام مه از طریق ازو باقی بمنه." پس او دبله امزو مnar نام خود خوره ایشت که تا امروز «یادگاری آبشالوم» گفته موشه.

## داود از مرگ آبشالوم خبر موشه

<sup>۱۹</sup> اوخته آخیمعص باچه صادوق گفت: "مره بیل که دویده بورم و د پادشاه خبر خوش برسن که خداوند د حق ازو انصاف کده و او ره از دست دشمنای شی نجات دده." <sup>۲۰</sup> لیکن یواب دزو گفت: "امروز تو خبر خوش نمودیری؛ تو میتنی یکو روز دیگه خبر خوش برسنی، ولی امروز ای کار ره نمونی، چراکه باچه پادشاه مرده." <sup>۲۱</sup> اوخته یواب دیگ نفر کوشی گفت: "بورو، چیزی ره که دیدی د پادشاه بگی." پس نفر کوشی د یواب احترام کد و دویده رفت.<sup>۲۲</sup> آخیمعص باچه صادوق بسم د یواب گفت: "هر رقم که موشه، لطفاً دز مه ام اجازه بدی که از پشت نفر کوشی دویده بورم." یواب گفت: "باچه مه، چرا میخاهی دویده بوری؟

تُو گَدَم خبر خوش نَدرى که بُبرى و جایزه بِكِيرى.<sup>۲۳</sup> او گفت: ”هر رقم که شُنَه، ما دَويده مورُم.“ پس يوآب گفت: ”بورُو!“ او خته آخِيمَعْص از راهِ آوارى دَويده رفت و از نفرِ كُوشى پيش شُد.

<sup>۲۴</sup> دَامْزُو غَيْت دَأوْود دَ دالِيز مينكل دُو درگه شار شِشْتُد؛ پَيرهدار دَ بله بام درگه دَ سر ديوال بُر شُد و دَ حاليكه توخ مُوكد، او يگ نفر ره ديد که تنهاي خُ دَويده مبيه.<sup>۲۵</sup> او خته پَيرهدار چيغ زَده دَ پادشاه خبر دَ. پادشاه گفت: ”اگه تنه آسته، خبرِ خوش دَ دان شى يه.“ دَ حاليكه او نفر آمده نزديك مُوشُد،<sup>۲۶</sup> پَيرهدار يگ نفر دِيگه ره ديد که دَويده مبيه؛ او خته پَيرهدار دَ دروازهوان گفت: ”يگ نفر دِيگه تنهاي خُ دَويده مبيه.“ پادشاه گفت: ”او ام خبرِ خوش ميره.“<sup>۲۷</sup> پَيرهدار گفت: ”دَويدونِ نفرِ اولى رقم دَويدونِ آخِيمَعْص باچه صادوق آسته.“ پادشاه گفت: ”او يگ آدم خُوب آسته و حتماً خبرِ خُوب ميره.“

<sup>۲۸</sup> آخِيمَعْص چيغ زَده دَ پادشاه گفت: ”خَير-و-خَيرَيت آسته!“ او خته او دَ پيش پادشاه قد رُوى خُ دَ زمى افتَد و گفت: ”حمد-و-ثنا دَ خُداوند، خُداي تُو! او امو مَردا ره که دست خُوره دَ خلافِ بادار مه پادشاه باله کُدد، دَ بادار مه تسلِيم کد.“<sup>۲۹</sup> پادشاه گفت: ”آيا أَبِشَالُوم باچه مه جور آسته؟“ آخِيمَعْص دَ جواب شى گفت: ”وختى يوآب مَره و خِدمتگارِ دِيگه پادشاه ره رَيى کد، ما غَدر غِريبو کَله ره دَيدُم، ليکن نَفَامِيدُم که چِيز خيل بُود.“<sup>۳۰</sup> پادشاه گفت: ”إِي سُو بيه و دَ اينجي ايسته شُو.“ پس او امونجى رفته ايسته شُد.

<sup>۳۱</sup> او خته نفرِ كُوشى رسِيد و گفت: ”بلده بادار مه پادشاه خبرِ خوش آسته! چُون خُداوند امروز دَ حق تُو انصاف کد و تُوره از دستِ تمامِ کسای که دَ خلاف تُو باله شُدد، نجات دَ.“<sup>۳۲</sup> پادشاه دَ نفرِ كُوشى گفت: ”آيا أَبِشَالُوم باچه مه جور آسته؟“ نفرِ كُوشى دَ جواب شى گفت: ”دُشمناي بادار مه پادشاه و تمامِ کسای که باله مُوشه تا دَز تُو ضرَر بِرسَنه، عاقبَت شى مثلِ امزُو جوان بَشه.“

<sup>۳۳</sup> پادشاه غَدر غَمگی شُد و دَأتاقی که بَلَه دالیزِ درگه شار بُود، بُر شُدہ چخرا کد.  
او دَحالِیکه مورفت، اینی رقم مُوگفت: ”آی باچِه مه آبشالوم! آی باچِه مه، آی  
باچِه مه آبشالوم! کشکه ما دَ جای تُو مُومردم، آی باچِه مه آبشالوم، آی باچِه  
مه!“

## يوآب داؤود ره سرزَش مُونه

**۱۹** <sup>۱</sup> دَ يوآب گُفته شُد که، ”اونه، پادشاه چخرا مُونه و بَلدِه آبشالوم ماتم  
گِرفته.“ <sup>۲</sup> پس پیروزی امزُو روز بَلدِه تمام لشکرَ ماتم تبدیل شُد، چُون مردمَ دَ  
امزو روز شِنید که پادشاه بخاطرِ باچِه خُو غَمگی شُدہ. <sup>۳</sup> لشکرَ دَ امزُو روز دُزکی دَ  
دَ شار داخل شُد، رقمِ کسای که از جنگ دُوتا کده بشه و از شرمندگی دُزکی دَ  
شار داخل شُنے. <sup>۴</sup> پادشاه رُوی خُو ره پوشند و پادشاه دَ آوازِ بلند چخرا کده  
گُفت: ”آی باچِه مه آبشالوم! آی باچِه مه آبشالوم، آی باچِه مه!“

<sup>۵</sup> اوخته يوآب دَ مَنه خانه دَ پیشِ پادشاه آمد و دَزُو گُفت: ”امروز تُو رُوی تمام  
خدمتگارای خُو ره قد شرم پوشندی، رُوی خدمتگارای ره که جانِ ازْتو و جانِ  
باچه ها و دُخترؤن تُو و جانِ خاتُونو و کنیزای تُوره نجات دَد. <sup>۶</sup> ازی که تُو  
دُشمنای خُو ره مُحبَت کدی و از دوستای خُو بَد بُردی، تُو امروز واضح کدی که  
قومَندا و خدمتگارا بَلدِه تُو هیچ آرژِش نَدره؛ چُون ما فامیدم که اگه آبشالوم  
امروز زِنده مُوبُود و مو پگ مو مُومردى، تُو خوش مُوشُدی. <sup>۷</sup> پس آلی باله شُدہ  
بُرو بیه و دَ خدمتگارای خُو تورای دلگرم کُننده بُگی؛ ما دَ خُداوند قسم مُخورم  
که اگه بُرو نَیی، امشاو یگ نفر ام قد ازْتو باقی نَمومَنه و ای بلا بدَر از تمام  
بَلاهای آسته که از جوانی تا آلی ره دَ بَلَه تُو آمده.“ <sup>۸</sup> اوخته پادشاه باله شُد و دَ  
پیشِ درگه شار شِشت؛ و دَ لشکر گُفته شُد که: ”اونه، پادشاه دَ پیشِ درگه شار  
شِشته،“ و پگ لشکر دَ پیشِ پادشاه آمد.

## پس آمدون داؤود د اورشلیم

د امزو غیت تمام لشکر إسرائیل دوتا کده د خانه‌های خو رفت. <sup>۹</sup> پگ مردم د تمام طایفه‌های إسرائیل قد یگدیگه خو جر-و-بحث کده مُوگفت: ”پادشاه مو ره از دست دشمنای مو خلاص کده و او کسی آسته که مو ره از دست فلسطینیا نجات دده، لیکن آلى او بخاطر أبصالوم از سرزمین مو دوتا کده؛ <sup>۱۰</sup> و أبصالوم ره که مو مسح کده د بله خو پادشاه جور کددی، او د جنگ کشته شد. پس آلى چرا د باره پس آوردون پادشاه هیچ چیز نموگید؟“

<sup>۱۱</sup> داؤود پادشاه د صادوق پیشوا و أبیاتار پیشوا اینی پیغام ره ری کده گفت: ”د ریش سفیدای یهودا بگید، چرا شمو د پس آوردون پادشاه د خانه شی از پگ کده آخر استید، د حالیکه توره تمام إسرائیل د پیش پادشاه د جایی که آسته رسیده؟ <sup>۱۲</sup> شمو بارون مه استید، شمو گوشت و استغون مه استید؛ پس چرا شمو د پس آوردون پادشاه از پگ کده آخر استید؟ <sup>۱۳</sup> و د عماسا بگید، آیا تو گوشت و استغون مه نیستی؟ خدا مره سخت جزا بدیه، اگه تو بلده همیشه د جای یواب قومندان لشکر مه نشنی.“

<sup>۱۴</sup> پس عماسا دل تمام مردای یهودا ره د دست آورد و پگ ازوا یگ دل و یگ فکر شد؛ و اونا د پادشاه پیغام ری کده گفت: ”تو و تمام خدمتگارای تو پس بیید.“ <sup>۱۵</sup> اوخته پادشاه پس آمد و د دریای اردن رسید؛ و مردم یهودا د دم راه پادشاه د جلجال آمد تا پادشاه ره از دریای اردن تیر کده بیره.

<sup>۱۶</sup> شمعی باچه جیرای بنیامینی از بحوریم د عجله قد مردم یهودا د دم راه داؤود پادشاه آمد؛ <sup>۱۷</sup> قد ازو یگ هزار نفر از بنیامین آمد و صیبا خدمتگار خانوار شائل قد پوزده باچه خو و بیست خدمتگار خو قد ازو قتی بود. اونا د عجله از دریای اردن د پیش پادشاه تیر شد. <sup>۱۸</sup> اونا تیر شده رفت تا خانوار پادشاه ره از

دريا تير کده بيره و هر کاري که د نظر پادشاه خوب معلوم شنه، انجام بدие.

شماعي باچه جира امي که از دريایي اُردن تير شد، او د پيش پادشاه روي د خاك افتاد<sup>۱۹</sup> و د پادشاه گفت: "اميدوا رأستم که بادارمه، مره گناهکار حساب نکنه و خطاي ره که خدمتگار شى د روزي بُر شدون بادار خو پادشاه از اورشليم مرتکب شده د ياد خونيره و پادشاه او ره د دل خونگيره.<sup>۲۰</sup> چون ما خدمتگار تو ميدنمن که ما گناه کديم؛ امزى خاطر اينه، امروز ما از تمام خانوار یوسف کده اوّلترا دَم راه بادار خو پادشاه آمديم."<sup>۲۱</sup> اوخته آبيشاي باچه صرُويه د جواب شى گفت: "آيا شمعي بخاطري که مسح شده خداوند ره دوکري کده، کشته نشنه؟"<sup>۲۲</sup> ليکن داؤود گفت: "آي باچه هاي صرُويه، شمو ره دَز مه چي غرض آسته؛ چرا شمو امروز دشمون مه شديد؟ آيا امروز ام يگو کس باید د إسرائييل کشته شنه؟ آيا ما نميدنمن که ما امروز پادشاه إسرائييل آستم؟"<sup>۲۳</sup> پس پادشاه د شمعي گفت: "تو نموموري." و پادشاه بلده ازو قسم خورد.

د امزو غييت مفييوشت نوسيه شائول ام دَم راه پادشاه آمد؛ او از روزي که پادشاه رفت تا روزي که صحیح-و-سلامت پس آمد، نه د فکر پاي هاي خو شدد، نه ريش خوره إصلاح کدد و نه کالاي خوره ششتد.<sup>۲۵</sup> وختيکه او از اورشليم دَم راه پادشاه آمد، پادشاه دزو گفت: "آي مفييوشت، چرا قد ازمه نمدي؟"<sup>۲۶</sup> او د جواب شى گفت: "آي بادارمه پادشاه، خدمتگار مه مره بازي دد؛ ما د خدمتگار خو گفتم، الاع مره پالون کوتا ما سوار شده د پيش پادشاه بورم؛ چون خدمتگار تو شل آسته؛ ليکن او امو کارره نکد،<sup>۲۷</sup> بلکه د بله خدمتگار تو د پيش بادارمه پادشاه تهمت کد. مگم بادارمه پادشاه رقم ملاليکه خدا آسته؛ پس هر چيزی که د نظر تو خوب معلوم موشه، امو ره انجام بدی.<sup>۲۸</sup> با وجود که تمام خانوار آته مه د پيش بادارمه پادشاه سزاوار دیگه چيز نبود بغیر از مرگ، ليکن تو خدمتگار خوره د مينكل کسای شندی که د دسترخون تو موخوره. پس ما دیگه چي حق درم که د پيش پادشاه ناله-و-فریاد کنم."

<sup>۲۹</sup> پادشاه دَزشی گفت: ”چرا ایقس کلو توره مُوگی؟ ما گُفتیم که تو و صِبِبا زمی ره تقسیم کنید.“ <sup>۳۰</sup> مِفِیبوشت د پادشاه گفت: ”بیل که پگ شی ره امو بِگیره؛ امی که بادار مه پادشاه صحیح-و سلامت پس د خانه خُو آمد، بلده مه هر چیز استه.“

<sup>۳۱</sup> اوخته بَرَزِلای جِعادی از روگلیم آمد تا قد پادشاه از دریای اُردن تیر شُنه و تا او ره همراهی کده از دریای اُردن تیر کنه. <sup>۳۲</sup> بَرَزِلای یگ مَردِ غَدر پِیر بُود که هشتاد سال عمر داشت. وختیکه پادشاه د مَحَناییم بُود، بَرَزِلای خوراک ازو ره تهیه مُوکد، چون او یگ مَردِ غَدر ثُروتمند بُود. <sup>۳۳</sup> پادشاه د بَرَزِلای گفت: ”قد ازمه بیه و د اورُشَلیم قد ازمه بُمن و ما فِکر خُو ره سُون تو مِیگِیرم.“ <sup>۳۴</sup> لیکن بَرَزِلای د پادشاه گفت: ”چند سال از زِندگی مه مَنده که ما قد پادشاه د اورُشَلیم بورم؟<sup>۳۵</sup> ما فِعلاً هشتاد ساله أَسْتُم. آیا ما مِیتنم خُوب و بَد ره فرق کنم؟ آیا خِدمتگار تو مَزِه چِیزی ره که مُوخوره و فُچی مُونه، مُوفامه؟ آیا وختیکه یگ خاتو یا یگ مَرد بَیت میخانه ما مِیتنم آواز شی ره بِشنُوم؟ پس چرا خِدمتگار تو بلده بادار خُو پادشاه یگ بارِ اضافی بَشه؟ <sup>۳۶</sup> آلی خِدمتگار تو قد پادشاه چند قدم د او طرف دریای اُردن موره و بس. چرا پادشاه از مه ایقس قدردانی کنه؟ <sup>۳۷</sup> لطفاً بیل که خِدمتگار تو پس بوره تا د شارِ خود خُو بُمره و د نزدیک قبر آته و آبه خُو دفن شُنه. لیکن اینه، خِدمتگار تو کِمَهام حاضر آسته، بلده شی اجازه بَدی که قد بادار مه پادشاه بوره و هر چِیزی که د نظر تو خُوب معلوم مُوشِه بلده شی انجام بَدی.“ <sup>۳۸</sup> پادشاه گفت: ”خُویه، کِمَهام قد ازمه بوره و ما هر چِیزی که د نظر تو خُوب معلوم شُنه بلده شی انجام مِیدیم؛ و تو هر چِیزی که از مه خاهش کنی بلده تو د جای میرم.“ <sup>۳۹</sup> پس تمام مردم از دریای اُردن تیر شُد؛ و پادشاه پیش از تیر شُدو بَرَزِلای ره ماخ کده برکت دد و بَرَزِلای پس د خانه خُو رفت. <sup>۴۰</sup> پادشاه از دریا د جِجال تیر شُد و کِمَهام ام قد شی قتی رفت. خُلاصه، تمام لشکر یهودا و نِیم لشکر اسرائیل پادشاه ره همراهی کده آورد.

<sup>۴۱</sup> اوخته تمام مَرْدَائِی إِسْرَائِيلَ دَپِيشِ پادشاه آمد و دَپادشاه گفت: ”آی پادشاه،  
چرا بِرَارُونَ مو مَرْدَائِی يَهُودَا، تُورَه دُزِی کَد و تُورَه خَانَوَارَ تُورَه قد تمام نفَرَای  
تُوقَتِی از دریای اُرْدُن تیر کَدَه اُورَد؟“ <sup>۴۲</sup> پَگِ مَرْدَائِی يَهُودَا دَجَوابِ مَرْدَائِی  
إِسْرَائِيلَ گفت: ”بِخَاطِرِی کَه پادشاه نزِدِيکانِه مو آستَه. پس شُمُو چرا دَزِی باره  
قارَ آسْتِید؟ آیا مو كُدمَ چِيز از پادشاه خورَدَيَ و يا دَزِی مو كُدمَ بخَشِشِی دَدَه؟“  
<sup>۴۳</sup> اوخته مَرْدَائِی إِسْرَائِيلَ دَجَوابِ مَرْدَائِی يَهُودَا گفت: ”مو دَپادشاه دَه حِصَّه  
درَيَ و حَقِ از مو دَدَأْوَد ام از شُمُو کَدَه کَلُوتَر آستَه. پس چرا مو ره خارَ-و-  
حَقِيرِ حِسابِ مُونِيد؟ آیا مو نَبُودِی کَه اوَّل دَبارِه پس اُورُدونِ پادشاه خُو تورَه  
گُفتَ؟“ لِيكِنْ تورَای مَرْدَائِی يَهُودَا از مَرْدَائِی إِسْرَائِيلَ کَدَه زورِ بُود.

## شورِشِ شِبَع

<sup>۲۰</sup> دَامْزُو غَيَّت يَگِ آدمِ فِتنَه- آنگِيزِ دَنَامِ شِبَعِ باَچِه بِكَرِي بِنيا مِينِي ام دَ  
أونجِي بُود. او شِيپُورِ ره دَصَداً اُورَد و گفت: ”مو دَدَأْوَد حِصَّه نَدَرِي و از  
باَچِه يَسَّى بَيَ نَصِيبِ آستَي! آيِ مَرْدُمِ إِسْرَائِيلَ هر كُدمَ شُمُو دَخِيمَه خُو بورِيد!“  
<sup>۲۱</sup> پس تمام مَرْدَائِی إِسْرَائِيلَ از پَيَرَوِي دَأْوَد دِستِ كَشِيد و از شِبَعِ باَچِه بِكَرِي  
پَيَرَوِي کَد؛ لِيكِنْ مَرْدَائِی يَهُودَا قد پادشاه خُو مَند و از اُرْدُن تا اورُشَالِيمَ او ره  
همراهِي کَد.

<sup>۲۲</sup> وختِي دَأْوَد دَخَانَه خُو دَأورُشَالِيمَ آمد، پادشاه امُو دَه خَاتُو ره کَه کَنِيزِ شِي بُود  
و بَلَدِه نِگاهوانِي خانَه ايشَتُد، گِرفَت و اُونا ره دَيَگِ خانَه نَظَرِينَد کَد. او ضرُورَت  
هَايِ ازوا ره تَهِيهِ مُوكَد، لِيكِنْ قد ازوا خاوَ نَمُوشَد. پس اُونا تا روزِ مُرْدونِ خُو  
نَظَرِينَد بُود و مِثَلِ بِيوهِ هَا زِندَگِي مُوكَد.

<sup>۲۳</sup> اوخته پادشاه دَعَماسا گفت: ”مَرْدَائِی يَهُودَا ره دَبَيَنِ سِه روزِ دَپِيشِ مَه جَمِ كُو  
و خَودِ تُو ام دَإِينِجي حاضِرَ بش.“ <sup>۲۴</sup> پس عَماسا رفت تا مَرْدَائِی يَهُودَا ره جَمِ كَنه،

لیکن از وختی که پادشاه بلده شی تعیین کدد، طال خورد.<sup>۶</sup> اوخته داؤود د آبیشای گفت: "آلی شیع باچه بکری از آبشالوم کده کلوتر دز مو ضرر میرسنه. پس نفرای بادار خو ره بگیر و او ره دمبال کو؛ نشنه که او شارای دیوالدار بلده خو پیدا کنه و از گیر مو خلاص شنه."<sup>۷</sup> پس نفرای یوآب قد کریتیا، فلیتیا و تمام مردای دلیر-و-جنگی از پشت ازو بُر شُد رفت؛ اونا از اورشلیم بُر شُد تا شیع باچه بکری ره دمبال کنه.<sup>۸</sup> وختی اونا د نزدیک سنگ کله د جبعون رسید، عماسا د دم راه ازوا آمد. یوآب کالای جنگی پوشید و دبله ازو یگ کمریند قد یگ خنجر که د غلاف خو بود د کمر شی بسته بود. امی که او پیش رفت خنجر از غلاف خو افتد.<sup>۹</sup> یوآب د عماسا گفت: "برار جو، چی حال داری؟" و یوآب قد دست راست خو ریش عماسا ره گرفت که او ره ماخ کنه.<sup>۱۰</sup> عماسا متوجه خنجری که د دست یوآب بود نشد. پس یوآب خنجر ره د کوره ازو چقی کد و روده های ازو د زمی بُر شُد و او مرد؛ حاجت د ضریبه دوم نشد.

اوخته یوآب و برار شی آبیشای د دمبال شیع باچه بکری رفت.<sup>۱۱</sup> و یکی از خدمتگارای یوآب د پالوی جسد عماسا ایسته شد گفت: "هر کسی که طرفدار یوآب و طرفدار داؤود آسته، از پشت یوآب بیهه".<sup>۱۲</sup> عماسا د مینکل راه د خون خو غوشه شد؛ و غیتی امو نفر دید که تمام لشکر د اونجی ایسته موشه، او عماسا ره از مینکل راه کش کده د صحراء بُرد و یگ رخت ره دبله شی آندخت، چون او دید که هر کس که د نزدیک ازو میمَد ایسته مُوشد.<sup>۱۳</sup> امی که جسد عماسا از مینکل راه باله شد، تمام لشکر از پشت یوآب رفت تا شیع باچه بکری ره دمبال کنه.

<sup>۱۴</sup> شیع از مینکل تمام طایفه های اسرائیل تیر شده د آبل بیت-معکه آمد و تمام بکریا قد ازو قتی بُود؛ اونا جم شده از پشت ازو آمد تا از شی حفاظت کنه.  
<sup>۱۵</sup> اوخته لشکر یوآب آمد و او ره د شار آبل بیت-معکه محاصره کد؛ اونا د برابر شار یگ بُغندی جور کد که او د بغل دیوال قرار گرفت و تمام لشکری که قد

یوآب بُود، دیوال ره مِیزَد تا او ره بیرو کنه.<sup>۱۶</sup> دَ امْزُو غَيْت يگ خاتُونِ دانا از مَنه شار کُوي کده گفت: ”گوش بِكِيرِيد! گوش بِكِيرِيد! دَ يوآب بُكِيد که دَ اينجى بِبيه تا ما قد شى توره بُكِيم.“<sup>۱۷</sup> وختِيكه یوآب نزديک رفت، خاتُو گفت: ”تو یوآب آستى؟“ او دَ جواب شى گفت: ”أَرِى، ما آسْتُم.“ اوخته خاتُو دَزُو گفت: ”توراي کِنيز خُوره گوش بِكِير.“ یوآب گفت: ”گوش مِيگِيرُم.“<sup>۱۸</sup> خاتُو گفت: ”دَ زَمانِ قدِيم اينى رقم گفته مُوشُد، دَ آبل رفته مشوره بِكِيرِيد.“ و دَ امزى رقم يگ قضيه حل-و-فصل مُوشُد.<sup>۱۹</sup> ما از شاري آسْتُم که دَ إسرائيل صُلح طلب و وفادار آسته؛ و تو ميخاهى امى شار ره که دَ إسرائيل مثل آبه آسته خراب کنى. چرا تو ميخاهى که ميراث خُداوند ره نابُود کنى؟<sup>۲۰</sup> یوآب دَ جواب شى گفت: ”از مه دُور بَشه! از مه دُور بَشه که ما شار ره خراب يا نابُود کُنم.<sup>۲۱</sup> قضيه او رقم نِيَسته که تو فِكر مُونى، بلکِه يگ نفر دَ نامِ شِبع باچِه بِكري که از كوهِستونِ إفرايم آسته، دست خُوره دَ خِلاف داؤود پادشاه باله کده. فقط امُونفر ره تسليم کنيد و ما از شار شُمو مورُم.“ خاتُو دَ يوآب گفت: ”اینه، سرِ ازو از بلِه دیوال بلده تو پورته مُوشه.“<sup>۲۲</sup> اوخته امُونخاتُو قد مشوره حکِيمانه خُور دَ پيشِ پگِ مردم رفت و اونا سرِ شِبع باچِه بِكري ره از تَن شى جدا کده بلده یوآب پورته کد. اوخته یوآب شِپُور ره دَ صَدا آورد و اونا از نزديک شار هر سُوتیت شُد و هر کس سُونِ خِيمِه خُورفت؛ ولئے یوآب پس دَ اورُشَليْم دَ پيشِ پادشاه آمد.

## نفرای دريارِ داؤود

<sup>۲۳</sup> دَ امْزُو غَيْت یوآب قومَدانِ تمامِ لشکرِ إسرائيل بُود و بنایاه باچِه يهویاداع قومَدانِ کريتيا و فليتيا؛<sup>۲۴</sup> آدورام مسُؤلِ کارگرای جَبرى بُود و يهوشافاط باچِه آخِيلُود کاتِب؛<sup>۲۵</sup> شيووا منشى بُود و صادوق و أبیاتار پيشوايو؛<sup>۲۶</sup> و عِيرَى يائيرى ام از طرفِ داؤود مقامِ پيشوايی داشت.

## داوود انتقام جِبعونیا ره از آولادِ شائول میگیره

۲۱ <sup>۱</sup> دَ زمانِ پادشاهی داؤود سِه سال دَوامدار قحطی شُد. اوخته داؤود از خُداوند هدایت طلب کد و خُداوند گفت: "ای حالت بخاطر شائول و خانوارِ خُونریزِ ازو پیش آمده، چراکه او جِبعونیا ره کُشت." <sup>۲</sup> جِبعونیا از جَمِ بنی اسرائیل نبُود، بلکه باقیمنده آموریا بُود؛ و بنی اسرائیل بلده ازوا قسم خوردد که اونا ره نمُوكُشه، لیکن شائول بخاطر غیرتی که بلده اسرائیل و یهودا داشت، قصد کدد که اونا ره از بین بُبره. پس داؤود جِبعونیا ره کُوى کد و قد ازوا توره گفت.

۳ <sup>۳</sup> و پادشاه دَ جِبعونیا گفت: "بلده شُمو چِیز کار کنم و گذشته ره چطور جِبران کنم تا شُمو قومِ خُداوند ره برکت بَدید؟" <sup>۴</sup> جِبعونیا دَز شی گفت: "مو از شائول و خانوار شی نُقره و طِلا طلب نَدری و نَه ام بلده مو اجازه آسته که دَ اسرائیل یگو کس ره بُکشی." داؤود پُرسید: "شُمو از مه چی میخاهید که بلده شُمو انجام بَدیم؟" <sup>۵</sup> اونا دَ پادشاه گفت: "امُو نفر که مو ره تَباه مُوكد و بلده مو نقشه میکشید که مو ره نابُود کنه تا دَ هیچ نقطه سرزمینِ اسرائیل باقی نَمَنی، <sup>۶</sup> هفت نفر از باچه‌گونِ خانوارِ ازو ره دَز مو تسلیم کُوتا مو اونا ره دَ حُضُورِ خُداوند دَ جِبعه شائول که انتخاب شده خُداوند بُود دَ دار آوزو کنی." پادشاه گفت: "اونا ره دَز شُمو تسلیم مُونم."

لیکن پادشاه مِفیبوشت باچه یوناتان ره ایله کد، چراکه قسمِ خُداوند دَ بین ازوا بُود، یعنی دَ بینِ داؤود و یوناتان باچه شائول. <sup>۷</sup> پس پادشاه دُو باچه رِصفه دُخترِ آیه ره که آرمونی و مِفیبوشت بُود و بلده شائول زَیده شُدد و پنج باچه میرَب دُخترِ شائول ره که بلده عدَرِئیل باچه بَرزلای مِحولاتی زَیده شُدد، گرفت <sup>۸</sup> و اونا ره دَ دستِ جِبعونیا تسلیم کد؛ جِبعونیا اونا ره دَ بَلَه کوه دَ حُضُورِ خُداوند دَ دار آوزو کد و امُو هفت نفر یگجای مُرد. اونا دَ شروعِ روزای جَم کدونِ حاصلات، دَ غَیتِ جَو درَو کُشته شُد.

<sup>۱۰</sup> اوخته رِصفه دُخترِ آیه یگ پلاس ره گِرفته دَبَلَه قاده بَلَدِه خُواهار کد و از شُروع جم کدون حاصلات تا غَيْتِيکه بارو از آسمو دَبَلَه ازوا بارِید، دَروز مُرغَکوی هوا ره و دَشاو جانورای بیابو ره نَاهیشت که دَبَلَه ازوا حَمله کنه.<sup>۱۱</sup> از کاری که رِصفه دُخترِ آیه، کنیزِ شائول کُدد، دَداُود خبر دَده شُد.<sup>۱۲</sup> اوخته داُود رفته استغونای شائول و استغونای باچِه شی یوناتان ره از مردم یابیش جِلعاد گِرفت. مردم یابیش جِلعاد امو جَسَد ها ره از میدانِ شارِ بیت-شان دُزی کده آُردد، از جای که فَلَسْطِينِیا اونا ره آزو کُدد؛ چون دَروزی که فَلَسْطِينِیا شائول ره دَجلبَوْع کُشْتُد او ره دَدار آزو کُدد.<sup>۱۳</sup> پس داُود استغونای شائول و استغونای باچِه شی یوناتان ره ازونجی آُرد و استغونای کسای ره که دَجِبعه دار آزو شُد ام جَم کد.<sup>۱۴</sup> دَمزی رقم اونا استغونای شائول و باچِه شی یوناتان ره انتقال دَده دَصیلَع دَسرزمینِ بنیامِین دَقبر قیس آته شائول دَفن کد و هر چیزی که پادشاه امر کُدد، اونا دَجای آُرد. بعد ازو خُدا دُعای ازوا ره که بَلَدِ سرزمِین خُو کُدد، قبول کد.

## جنگ دَ خِلافِ فَلَسْطِينِیا

<sup>۱۵</sup> بَینِ فَلَسْطِينِیا و إسرائيل بسم جنگ شُد و داُود قد خدمتگارای خُورفته دَ خِلافِ فَلَسْطِينِیا جنگ کد و داُود از حال رفت.<sup>۱۶</sup> اوخته یشبی-بنوب که یکی از اولادِ رافا بُود و گِرنگی نیزه شی سِه صد مِثقال برونز بُود و یگ شمشیر نَوَّد کمر خُو دَشت، قَصَدِ کُشتونِ داُود ره کد.<sup>۱۷</sup> لیکن آبیشای باچِه صَرُویه دَ کومک ازو آمد و امو فَلَسْطِینِی ره زَده کُشت. اوخته نفرای داُود قَسَم خورده دَزو گُفت: ”تو دِیگه قد ازمو دَ جنگ نَمیی؛ نَشنُه که تو چِراغِ إسرائيل ره گُل کنی.“

<sup>۱۸</sup> بعد ازی یگ جنگ قد فَلَسْطِينِیا دَگوب در گِرفت که دَامزو جنگ سِبکای حُوشاتی ساف ره کُشت؛ ساف ام یکی از اولادِ رافا بُود.<sup>۱۹</sup> بعد ازو یگ جنگ

دِیگه قد فَلَسْطِينِيَا دَ گُوب دَر گِرْفَت و دَزُو جَنَگِ الحَانَان باچِه ياعير بَيْت-لَحَمِي،  
جُلِياتِ جَتِي ره کُشت که چيو نَيْزَه شى رقمِ چيو كارگاهِ بافنَدَگى بُود. <sup>٢٠</sup> يگ  
جنگِ دِیگه دَ جَت دَر گِرْفَت؛ دَ أُونِجِي يگ مَرَدِ قد بلند بُود که هر دِسْت و پَاي  
شى شَشِ كِلَك دَشَت که جُمِلَه ازوا بِيَسَت و چارِ كِلَك مُوشُد؛ او ام از أَوْلَادِه  
رافا بُود. <sup>٢١</sup> و خَتِيكَه او إِسْرَائِيل ره طَعْنَه دَد، يُونَاتَان باچِه شِمعَى، باچِه بِرَارِ دَأُود  
او ره کُشت. <sup>٢٢</sup> امي چار نفر از أَوْلَادِه رافا دَ جَت بُود که دَ دِسْتِ دَأُود و  
خِدمَتَگارَاي شى کُشْتَه شُدَه افَتَد.

## سُرُودِ شُكْرِگَزارِي دَأُود

<sup>١</sup> دَأُود دَ روزِي که خُداوند او ره از دِسْتِ پَگِ دُشمنَى شى و از دِسْتِ  
شائول خلاصَ کد، توره هَاي امزى سُرُود ره دَ وَصَفِ خُداوند خاند <sup>٢</sup> و گُفت:

”خُداوند قاده-و-پناهگاهِ مه آستَه، قلعه و نجات دِهندَه مه.

<sup>٣</sup> او خُدَى مه آستَه، قاده مه که دَزُو پَناه مِيگِيرُم،

سِپِر مه و قُدرَتِ نجات مه؛

قلعه بلند مه؛ پناهگاهِ مه و نجات دِهندَه مه،

تو مَره از ظُلْمِ نجات مِيدَي.

<sup>٤</sup> خُداوند ره که لايِقِ حمد-و-ثنا آستَه، كُويِ كُدم

و ما از چنگِ دُشمنَى خُونِجات پَيَدا كُدم.

<sup>٥</sup> چراکه جلپه هَاي مَرَگِ چارَدَورِ مَره گِرفَتْد

و سیل های تباھی دَبِلَه مه هُجُوم آوردد؛

<sup>٦</sup> ریسپونای عالم مُرده ها دَدور مه خود ره پیچند

و دام های مرگ دَپیشِ روی مه ایشته شد.

<sup>٧</sup> ما دَغیتِ سختی-و-مشکلات خُو خُداوند ره کُوى کدم

و دَپیشِ خُدای خُوناله-و-فریاد کدم.

او از جایگاه خُو آواز مره شنید

و ناله-و-فریاد مه دَگوشِ ازو رسید.

<sup>٨</sup> او خته زمی لَرزه کده تکان خورد؛

و بُنياد های آسمو شور خورده

از شدّتِ قارِ ازو دَحرکت آمد.

<sup>٩</sup> از بینی شی دُود بُر شد

و از دان شی آتشِ ذوب کُننده

که از شی قوغ ها باد مُوشد.

<sup>١٠</sup> او آسمو ره خَم کد و تاه آمد

و دَتَی پای شی تریکی تیره بُود.

۱۱ او دَبَلِه کِروبی سوار شُدہ پِرواز کد

و دَبَلِه بال های باد دیده شُد.

۱۲ او تِریکی ره دَ چارَور خُو سایبان جور کد،

آُرهاي تِريک ره که دَز شی آوها جَم أسته.

۱۳ از روشنی حُضُور ازو

قوغ های آتش باد شُد.

۱۴ خُداوند از آسمو گُرگُرداخ کد؛

قادِرِ مُتعال آواز خُو ره بُر کد.

۱۵ او تیرها ره ايله کده دشمنا ره تیتپرک کد

و آتشک رَیی کده اونا ره دَ گَلَگَلَمیری آندخت.

۱۶ او خته غَوْجی های دریا دیده شُد

و بُنیادِ زمی نُمایان شُد،

از هَیَبَتِ خُداوند

و از شَمالِ بادِ بینی ازو.

۱۷ او از عالم باله دَ کومک مه رسیده مرہ گرفت

و از آوهای گلو بُرو بُر کد.

۱۸ او مَره از چنگِ دشمنونِ زورتُوی مه خلاص کد،

از چنگِ کسای که از مه بَد مُویرد؛

چون اُونا از مه کده گلو زورتُو بُود.

۱۹ دَ روزی که دُچارِ بلا-و-مُصِبِّت بُودم، اُونا دَ جان مه آمد،

لیکِن خُداوند پُشتیوان مه بُود.

۲۰ او مَره بُر کده دَ جای پراخ آورد؛

او مَره نجات دَد، چراکه او از مه راضی بُود.

۲۱ خُداوند دَ مُطابِقِ عدالت مه دَز مه آجر دَد،

دَ مُطابِقِ پاکی دِستای مه قد مه رفتار کد.

۲۲ چراکه ما راه های خُداوند ره نگاه کدیم

و شریرانه از خُدائی خُروی گردو نشُدیم.

۲۳ پگِ احکامِ اُزو دَ پیشِ روی مه بُوده

و از دستورای شی دُور نشُدیم.

۲۴ ما دَ حُضورِ اُزو بے عَیب بُودیم

و خود ره از گنگاه دُور نگاه کدیم.

**۲۵** پس خُداوند دَز مه آجر دَد، دَ مُطابِق عدالت مه

و دَ مُطابِق پاکی دِستای مه که دَ پیش نظرِ ازو يه.

**۲۶** خُداوندا، دَ آدم وفادار، تُو وفاداری خُو ره نشو میدی؛

دَ نفر بے عَيْب، تُو بے عَيْبِي خُو ره نشو میدی.

**۲۷** دَ آدم پاک، پاکی خُو ره نشو میدی،

ليکِن دَ آدم چَلَباز، هُوشياری خُو ره نشو میدی.

**۲۸** تُو قَوم مظلوم ره نجات میدی،

ليکِن چِيمای تُو دَ آدمای كِبرى-و- مغرور أَسته تا اونا ره سرنگون کنی.

**۲۹** آى خُداوند، تُو نور مه أَستى؛

خُداوند ترِيکي مره دَ روشنی تبدیل مُونه.

**۳۰** دَ كومک از تُو ما دَ بلَه لشکر حَمله مُونم

و قد توَكُل دَ خُدائی خُو دَ بلَه ديوال شار ها بُر مُوشُم.

**۳۱** خُدا راه-و- طرِيق شی كامل أَسته؛

كلامِ خُداوند خالص أَسته.

او بَلِدِه تمامِ کسای که دَزُو پناهِ مُوبیره سِپر آسته.

چُون غَير از خُداوند، کِي خُدا آسته؟<sup>۳۲</sup>

و غَير از خُدائِ مو، کِي قاده-و-پناهگاِه مو آسته؟

خُدا پناهگاِه مُستَحکم مه آسته؛<sup>۳۳</sup>

او راه-و-طريقِ مَره بَعْ خطر جور مُونه.

او پایای مَره رقمِ پایای آهُو جور مُونه<sup>۳۴</sup>

و مَره دَجای های بِلند ایستَلْجی مُوکنَه.

او دِستای مَره بَلِدِه جنگ تمرین مِیدیه<sup>۳۵</sup>

تاكه بازو های مه بِتنه کمونِ برونزی ره خَم بَدیه.

آی خُداوند، تُو سِپرِ نجات خُوره دَز مه دَدے<sup>۳۶</sup>

و كومَك از تو مَره بُزُرگ جور کد.

زیرِ پای مَره بَلِدِه قَدم های مه پِراخ جور کدے<sup>۳۷</sup>

تاكه پایای مه نَلَخَشَه.

ما دُشمنای خُوره دُمبال کده اُونا ره نابُود مُونم<sup>۳۸</sup>

و تاكه نابُود نَشُدَه، پس دَور نَمُوخُرُم.

۳۹ ما اُونا ره نابُود کُدم؛ ما اُونا ره زَدُم تا دِیگه باله نَشْنَه؛

اُونا دَتَی پای مه اُفتَد.

۴۰ چُون تُو کمر مَرَه قد قُوت بَلَدِه جنَگ بَسْتَه کَدَے

و مُخالِفَای مَرَه دَتَی پای مه اندَختَی.

۴۱ تُو گَرْدُون دُشْمَنَای مَرَه دَدِسْت مه دَدَی

و ما كَسَای ره که از مه بَد مُوپُرد، نابُود کُدم.

۴۲ اُونا چِیم دَرَاه بُود، لیکِن هیچ کس نَبُود که اُونا ره نِجَات بِدِیه؛

اُونا پیش خُداوند ناله-و-فریاد کد، ولیے او دَزوا جواب نَدَد.

۴۳ ما اُونا ره کُفَتَه رقمِ خاکِ زَمِنِ نَرَم کُدم

و دَبَلَه ازوَا لَغَه کده رقمِ گِلِ کُوچَه پایمال کُدم.

۴۴ تُو مَرَه از جنَگَالِ قَوم مه خلاص کَدَی

و مَرَه دَعِنَوانِ کِتَه مِلَّت ها برقرار نِگَاه کَدَی؛

مردُمِی ره که نَمِيشَنَخَتم مَرَه خِدمَت مُونَه.

۴۵ بیگَنَه گو خَم شُدَه دَپیش مه آمد

و امی که اُونا تورِه مَرَه مِيشَنَوه، از آید مه مُوشَه.

۴۶ بیگنگو بے روحیه شد

و از جای های مُستَحکم خُو قد ترس-و-لرز بُرو آمد.

۴۷ خُداوند زِنده يه! حمد-و-ثنا دَقاده-و-پناهگاهِ مه!

مُتعال باد خُدای که قاده نجات مه آسته،

۴۸ خُدای که انتقام مَره گرفت

و قَوم ها ره زیر حُکمرانی مه اُورد،

۴۹ خُدای که مَره از چنگ دشمنای مه بُرو اُورد.

خُداوندا، تُو مَره دَبرابر مُخالفای مه سريلند کدی

و از دِستِ آدم ظالم نجات دَدی.

۵۰ امزی خاطر آی خُداوند، تُوره دَمینکل مِلت ها حمد-و-سپاس مُوگیم

و بلده ستایشِ نام تُو سرود میخانم.

۵۱ او پیروزی های بُزرگ ره نصیب پادشاه خُو مُونه

و رَحمت خُو ره دَمسَح شُدِه خُو نشو میدیه،

دَداُود و اولادِه شی تا آبدالآباد.“

## تورای آخر داؤود

۲۳ <sup>۱</sup> اینمیا تورای آخر داؤود آسته:

وَحَىٰ دَاؤُود بِاْجِهٖ يَسِّىٰ،

وَحَىٰ مَرْدِى كَه بِلَنْد مَرْتَبَه شُدُّ،

وَحَىٰ مَسَح شُدِّه خُدَائِي يَعْقُوب

و سُرُودخانِ مَوْرِدِ پِسَنْدِ إِسْرَائِيل؛

۲ روح خُداوند از طَرِيقِ ازمه توره مُوگیه

و كلام اُزو د سِر زِبون مه آسته.

۳ خُدَائِي إِسْرَائِيل توره گُفت،

قادِه و پناهگاهِ إِسْرَائِيل دَز مه گُفت:

’كَسِي كَه دَبَلِه مَرْدُم عَادِلَانَه حُكْمَرَانِي كَنه

و دَخُدا ترسی پادشاهی كنه،

۴ او رقمِ روشنی صُبْحِ آسته،

رقم آفتَوی که دِيگ صُبْح بَى آُور بُر مُوشَه،

رقمِ روشنی بعد از بارو

که علف ره از زمی سَوزِلْجی مُونه.<sup>۴</sup>

آیا خانوار مه دَ حُضُورِ خُداوند امی رقم نییه؟

چُون او قد ازمه عهدِ آبدی بسته کده

که از هر نگاه با ترتیب و مُسْتَحکم آسته.

آیا او باعث نَمُوشَه که تمامِ کامیابی مه

و تمامِ آرزوهاي مه دَ ثَمَر بِرَسَه؟

لیکن آدمای شریر-و-بدکار رقم خارهای آسته که دُور آندخته مُوشَه،

چراکه اونا قد دست گرفته نَمُوشَه.

کسی که میخایه دَزْوا دست بِزَنه،<sup>۵</sup>

باید یگ آسبابِ آینی یا یگ چیو نَیزه ره إستفاده کنه.

أونا دَ امُونجى که آسته دَ امُونجى سوختنده مُوشَه.“

## نفرای جنگی داؤود

نامهای مردای دلیر-و-جنگی داؤود اینیا آسته: یوشیب-بَشِبَتِ تَحَكِّمُونی که سرکرده قومدانان بُود، او نَیزه خُوره دَ خِلافِ هشت صد نفر باله کد و اونا ره دَ یگ زمان کُشت.

بعد ازو العازار باچه دودو نوسه آخوخي بُود. وختیکه داؤود فَلَسْطِينِیَّا ره که دَ اونجی بلده جنگ جَم شُدد دَ مُبارِزَه طلب کد، العازار یکی امزُو سِه نفر دلیر-و-

جنگی بود که قد داؤود قتی آمد. مردای إسرائیل عَقَبَ نَشِينی کد،<sup>۱۰</sup> لیکن العازار ایسته شده قد فَلَسْطِینِیا جنگ کد تا غَیْتِیکه دست شی مَنَدَه شُد و شمشیر دَ دست شی چسپید. خُداوندَ امْزُو روزِ یگ پیروزی کله نصِيبِ ازوا کد. اوخته لشکر دُوباره دَ پیشِ ازو آمد، لیکن فقط بخاطرِ لُج کدونِ کُشته شده‌ها.

۱۱ بعد ازو شَمَه باچه آگے هَارَی بود. وختیکه فَلَسْطِینِیا دَ لِحِی جم شُد، دَ جای که بگ پَٹی زمی پُر از عَدَس بود؛ لشکرِ إسرائیل از پیشِ فَلَسْطِینِیا دُوتا کد،<sup>۱۲</sup> لیکن شَمَه دَ مِنِکَلِ امْزُو پَٹی زمی ایسته شده او ره نگاه کد و فَلَسْطِینِیا ره شِکست دَد. دَ امزی رقم خُداوند یگ پیروزی کله نصِيبِ ازوا کد.

۱۳ دَ دورونِ جم کدون حاصلات سِه قومَدان از جُمله سِه قومَدان تاه شده دَ غارِ عَدُلَام دَ پیشِ داؤود آمد؛ دَ امْزُو غَیْتِ یگ لشکرِ فَلَسْطِینِیا دَ دَرِه رِفَائِیم خَیْمه زَد. <sup>۱۴</sup> داؤود دَ او زَمان دَ پناهگاهِ خُو بود و پیره‌دارخانه فَلَسْطِینِیا دَ بَیْت-لَحَم قرار داشت. <sup>۱۵</sup> داؤود هَوَس کده گفت: ”کشکه یَگو کس از چاهی که دَ نزدِیکِ درگِه بَیْت-لَحَم آسته دَز مه آو بیره تا وُچی کنُم.“ <sup>۱۶</sup> اوخته امو سِه نفرِ دلیر-و-جنگی لشکرِ فَلَسْطِینِیا ره از مِنِکَل شی شَق کده از چاهی که دَ نزدِیکِ درگِه بَیْت-لَحَم بود آو کشید و گِرفته دَ پیشِ داؤود اُورد؛ لیکن داؤود آو ره وُچی نکد، بلکه او ره دَ عنوانِ هدیه بَلَدَه خُداوند لَوَو کد<sup>۱۷</sup> و گفت: ”آی خُداوند، از مه دُور بشه که ای کار کنُم! آیا ای خُونِ امزی مردای نییه که جان خُو ره دَ خطر آندخته رفت؟“ امزی خاطر او نخاست که آو ره وُچی کنه. امی کارای بُود که امو سِه نفرِ دلیر-و-جنگی انجام دَدد.

۱۸ آبِیشای برارِ یوآب باچه صَرُویه سرکردِ امْزُو قومَدانَا بُود. <sup>۱۹</sup> او نامِ توَرِینِ امْزُو سِه بُود و قومَدانِ ازوا شُد، لیکن دَ سِه نفرِ اوّل نَمِیرَسید.

۲۰ بنایاه باچه یهويادع یگ مردِ دلیر از قَبَصَئِیل بُود که کارای کله کدد؛ او دُو باچه آرِیئِلِ موآبی ره کُشت و دَ یگ روزِ بَرْفی دَ یگ چُقُوری تاه شده یگ شیر

ره از بین بُرد.<sup>۲۱</sup> او يگ مَرَدِ خوش-آندامِ مصری ره ام کُشت. امُو مَرَدِ مصری دَ دِستِ خُو يگ نَیزه دَشت، ولے بِنایا ه قد يگ سوٹه چيو دَ جنگ اُزو رفت و نَیزه ره از دِستِ امزُو مصری گِرفته او ره قد نَیزه خود شی کُشت.<sup>۲۲</sup> امی کارای بُود که بِنایا ه باچه يهو ياداع انجام دَ و رقمِ امزُو سِه نفرِ دلیر-و-جنگی نامُتو شُد.<sup>۲۳</sup> او دَ مينکلِ امزُو سی نفرِ نامُتو صاحِبِ احترام شُد، ليکن دَ سِه نفرِ اول نَمِيرَسِید و داؤود او ره قومَدانِ مُحافظِين خُو مُقرر کد.

<sup>۲۴</sup> اينی کسا شاملِ امزُو سی نفر بُود:

عَسَائِيلِ بِرَارِ يوَاب،  
الحانان باچه دودوی بَيت-لَحْمِي،  
<sup>۲۵</sup> شَمِّه حَرُودِي،  
الِيقَايِ حَرُودِي،  
<sup>۲۶</sup> حَالَصِ فَلَطِي،  
عِيرا باچه عِقِيشِ تِقوعِي،  
<sup>۲۷</sup> أَبِيعِزِرِ عَنَاتُوتِي،  
مبونای حوشاتی،  
<sup>۲۸</sup> صَلَمونِ أَخُوهِي،  
مهرای نِطوفاتی،  
<sup>۲۹</sup> حَالَب باچه بعنِه نِطوفاتی،  
إتای باچه ریباي از جِبعِه بِنِيامِين،  
<sup>۳۰</sup> بِنِيایا پِرِعَاتُونِي،  
هِدَای از تَنگَی های جاعَش،  
<sup>۳۱</sup> أَبَوعلبونِ عَربَاتِي،  
عزمَوتِ بَرَحومِي،  
<sup>۳۲</sup> الْيَحْبَى شَعَلْبُونِي يکی از باچه‌گونِ ياشَن،

یوناتان <sup>۳۳</sup> باچه شمّه هَراري،  
 آخيام باچه شارِ هَراري،  
 اليفِلط باچه أحَسْبَى مَعَكَاتِي،  
 اليعام باچه أَخِيتُوْفِل جِيلونى،  
 حِصْرَى كَرْمَلِي،  
 بَعْرَى أَرَبِى،  
 يِگال باچه ناتان از صویه،  
 بانی جادى،  
 صالح عمونى،  
 نَحْرَى بَئِيرُوتِي سلاح-بَرْدَار يوآب باچه صَرُوْيَه،  
 عِيرَى يَتَرِى،  
 گارِبِ يَتَرِى  
 و اوپريايى حتى.

جُمله سى و هفت نفر.

## داوود سرشُمارى مُونه

**۲۴** آتشِ قارِ خُداوند بسم دَضِ إِسْرَائِيل دَر گِرفت، چُون او داؤود ره دَ  
 خِلافِ ازوا باله کد و گفت: ”بورُو، إِسْرَائِيل و يهُودا ره سرشُمارى کُو.“ <sup>۱</sup> پس  
 پادشاه دَ يوآب قومَدان لشکر خُو که قد شى قتى بُود گفت: ”بورُو، دَ مينكلِ تمامِ  
 طایفه های إِسْرَائِيل از دان تا بئيرشِبع بِگرد و مردم ره سرشُمارى کُو تا تعدادِ  
 مردم ره بِدنُم.“ <sup>۲</sup> يوآب دَ پادشاه گفت: ”خُداوند، خُداى تو تعدادِ مردم ره صد  
 برابر گَلوتر کنه و چِيمای بادار مه پادشاه ام اي ره بِنگره! ليکن چرا بادار مه  
 پادشاه ميخايه که اي کار ره کنه؟“ <sup>۳</sup> مگم تورِه پادشاه دَ بَلَه يوآب و قومَداناي

لشکر زور شد. پس یوآب و قومَنданای لشکر از پیش پادشاه رفت تا مردمِ اسرائیل ره سرشماری کنه.<sup>۵</sup> اونا از دریای اردن تیر شد و دَ نزدیک عروعین، د طرفِ راستِ شاری که د مینکل دَرِه جاد سُون یَعزیزِ آسته خیمه زد.<sup>۶</sup> بعد ازو اونا دَ جِلعاد و سرزمین تختیم - حُدشی رفت و ازونجی دَ دان - یعن آمده طرفِ صیدون دور خورد<sup>۷</sup> و دَ قلعه صُور و تمام شارای حَویا و کِنعانیا رفت و د جنوبِ یهودا تا بئیرشبَع آمد.<sup>۸</sup> پس وختیکه اونا دَ تمام سرزمی گشت، اونا بعد از نه ماه و بیست روز دُوباره دَ اورشلیم آمد.<sup>۹</sup> یوآب تعدادِ مردمی ره که سرشماری شد دَ پادشاه گفت: از اسرائیل هشت صد هزار مردِ جنگی شمشیرزن بُود و از یهودا پنج صد هزار مرد.

<sup>۱۰</sup> داؤود بعد از سرشماری کدونِ مردم خود ره دَ دل خُو ملامت کد. پس داؤود د خداوند گفت: "امی کار ره که کدیم، گناهِ غدر کله ره مُرتکب شدیم. آلى آی خداوند، خاهشِ مُونم که گناهِ خدمتگار خُو ره بیخش، چراکه ما غدر یگ کارِ احمقانه کدیم."<sup>۱۱</sup> صباحگاهِ روزِ دیگه شی وختیکه داؤود از خاو باله شد، کلامِ خداوند دَ جادِ نبی که بلده داؤود پیشگویی مُوكد، آمده گفت:<sup>۱۲</sup> "بورو و دَ داؤود بُگی که خداوند اینی رقم مُوگیه، 'ما سِه چیز ره دَ پیش تُو میلُم؛ تُو یکی ازوا ره انتخاب کُو و ما او ره دَ حق تُو انجام میدیم'." <sup>۱۳</sup> پس جاد دَ پیش داؤود رفته دُزو گفت: "هفت سال قحطی دَ سرزمین تُو بییه؟ یا سِه ماه از پیشِ دشمنای خُو دُوتا کنی و اونا تُو ره دُمبال کنه؟ یا بلده سِه روز سرزمین تُو دَ مَرضِ ویا گِرفتار شُنه؟ آلى فکر کُو و تصمیم بِگیر که ما دَ امزُو که مره رَی کده چی جواب بُرم." <sup>۱۴</sup> داؤود دَ جاد گفت: "سخت بیچاره شدیم. بهتر آسته که دَ دستِ خداوند بُفتی، چون رَحمتِ ازو بُزرگ آسته؛ ولی نیل که دَ دستِ انسان بُفتم."

<sup>۱۵</sup> پس خداوند مَرضِ ویا ره امزُو صُبح تا وختِ تعیین شده دَ بله اسرائیل رَی کد و هفتاد هزار نفرِ قوم از دان تا بئیرشبَع مُرد.<sup>۱۶</sup> وختی ملایکه دستِ خُو ره دَ بله اورشلیم دراز کد تا او ره بیخی تَباہ کنه، خداوند رَحم کده دَمَ بلا ره گِرفت و د

ملایکه که مردم ره از بین مُویرد گفت: "بس آسته! دست خوره بگیر." دامزو غیت ملایکه خداوند نزدیک خرمونجوی آرونه یوسی بود.<sup>۱۷</sup> وختی داؤود امۇ ملایکه ره که مردم ره میزد دید، او دخداوند گفت: "توخ کو، ما گناه کدیم؛ خطا از مه سر زده؛ ولی امی گوسپندو چیز کار کده که دبلا گرفتار شده؟ پس لطفاً بیل که دست تو دبله ازمه و دبله خانوار آته مه دراز شنے."

## داؤود یگ قربانگاه آباد مۇنه

<sup>۱۸</sup> دامزو روز جاد دپیش داؤود اماد و دز شى گفت: "بورو، يگ قربانگاه بله خداوند دبله خرموجوی آرونه یوسی آباد کو."<sup>۱۹</sup> پس داؤود مطابق گفته جاد، امو رقم که خداوند امر کد، رفت.<sup>۲۰</sup> وختی آرونه توخ کد و دید که پادشاه و خدمتگارای شى سۇن ازو مىيە، آرونه رفت و دپیش پادشاه خود ره قد روی خو دزمى آندخت<sup>۲۱</sup> و آرونه گفت: "چطور که بادار مه پادشاه دپیش خدمتگار خو امده؟" داؤود گفت: "آمدیم تا خرموجوی ره از تو بخرم و يگ قربانگاه بله خداوند آباد کنم تا مرض ویا از بله مردم دور شنە."<sup>۲۲</sup> آرونه د داؤود گفت: "بادار مه پادشاه هر چیزی که دنظر شى خوب معلوم موشە، بگیره و تقديم کنه. اينه، گاو ها بله قربانی سوختنی، چپر و یوغ گاو ها ام بله هيزم حاضر آسته."<sup>۲۳</sup> آی پادشاه، آرونه پگ امزى چیزا ره دز تو میديە. "امچنان آرونه د پادشاه گفت: "دعا مۇنم که خداوند، خدائی تو قربانی تو ره قبول کنه."

<sup>۲۴</sup> لیکن پادشاه د آرونه گفت: "نه، ما اونا ره د هر قیمت که تو بگی، دمزو قیمت از تو میخرم؛ ما بله خداوند، خدائی خو قربانی سوختنی بدون قیمت تقديم نمۇنم." پس داؤود خرموجوی و گاو ها ره د پنجاه مثقال نقره خرید.<sup>۲۵</sup> و داؤود د اونجى يگ قربانگاه بله خداوند آباد کد و قربانی هاي سوختنی و قربانی هاي سلامتى تقديم کد. اوخته خداوند دعای ازو ره بله سرزمین شى قبول کد و مرض ویا از إسرائیل دور شد.

سوال دارید؟  
+1 807.700.6090  
آزرسکی © afghanbibles.org